

ASO FARAILE, 20 IANUARI 2023

Na nofoia e le Fofoga Fetalai le Nofoa i le itula e 9:27 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofa Fautalafono.

O lea ua tea i lagi le tatou taulaga o le faafetai i le Atua i lenei taeao, aua ua tala mai le lagi lona mamalu, ua faaalua foi e le vanimonimo galuega mamana a Ona aao. O lea ua tatou toe fesilafai ai i lagona o le olioli ma Lona toafilemu. Ou te toe faatalofa atu ai i lenei taeao i le paia o le Palemene ma le Maota nei, faamalo le soifua manuia ma le lagi e mama. Faamalo le onosai ma le faatoatoa, o lea ua tatou i ai i le toe aso o galuega o lenei vaiaso. Malo le tauatai, faafetai le faatoatoa.

Talofa Samoa i lau faafofoga mai i lenei taeao, malo le lagi e mama. Ia i ai pea le agalelei o le Atua i si o tatou atunuu. O le tatou galuega o lenei aso, e i ai foi le manatu o le aso puupuu lenei, e tua foi i le faaiuga o le vaiaso, aemaise o tapenaga mo le Sapatu paia o le tatou Alii. Ia alofagia e le Atua le alofaiva o le tatou Palemene i lenei aso. Manuia foi lau tapuaiga si o tatou atunuu.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2022/2023 – felafolafoaiga faaauau i luga o le
faitauga faalua – Aso 4**

FOFOGA FETALAI: E tolopo felafolafoaiga i le aso Fono ananafi ua maea saunoa le sui usufono mo Faleata 4.

Ia o le avanoa lenei mo se isi sui usufono mamalu e fia saunoa.

Ia, lea ua maitau atu o lea ua fou mai le sa o le sui usufono tamaitai mai Alataua Sisifo. Ia o le avanoa lea i lau Afioga i le sui usufono mamalu.

**Afioga ALIIMALEMANU MOTI MOMOEMAUSU ALOFA
TUUAU (Sui usufono Tamaitai-Alataua Sisifo):** Faafetai mo lou avanoa. Lau Afioga i le Fofoga Fetalai faapea sui usufono mamalu uma o le Palemene, Samoa ua tatou faatasi i lenei taeao, faapea foi Samoa o lo o

faafogafoga tapuai mai. O se taeao manuia lenei taeao i le faamaoni o le folafolaga a lo tatou Atua e fou Lona alofa i taeao taitasi ma aso uma.

O lea ua maea ona fa'i le pou aua lo tatou Matai, o tatou loto uma ia, aua ua tatou molimauina pea vavega o le alofa tunoa o le Atua ia Samoa faapea lau Afioga i le Fofoga Fetalai ma sui usufono mamalu uma o le Palemene, tainane foi Samoa o lo o faafogafoga tapuai mai, aemaise o Lana puipuiga i si o tatou atunuu. Pe a tatou tomanatu i puapuaga o lo o fetaiia pea ma le tele o atunuu o le lalolagi, e faamautuina ai pea le mau a lenei itumalo, o Samoa o le atunuu faamanuiaina.

Lau Afioga i le Fofoga Fetalai ua ou tulai atu ma le ava tele se i fai lava sina sao o le matou itumalo o Alataua i Sisifo i le Tala Faatatau Faaopoopo Muamua o le Tupe, aemaise foi o le tamaoaiga i lona tulaga aoaotetele.

O le vaai a lenei itumalo i lona aotelega, e \$6.6miliona nai a tatou tupe maua faaopoopo. E \$4miliona lea ua ave e faaola ai mea o lafoga ma tiute i tulaga faale-Tulafono, mea masani. E \$533,366.00 na pau lea o le tupe o lo o faaopoopo mo polokalame o galuega faatino. A o le \$2,066,634.00 o le faasiliga lea o tupe maua mai tupe alu lea ua tuuina sao lava e faaitiitia ai le tupe pau o le tatou Tala Autu o le Tupe, mea masani. E talitonu la e leai ni avanoa e talanoa ai i ni manaoga o itumalo, aua e leai ni vaegatupe faaopoopo e avatu ai ni talosaga. Ae talitonu o lea ua uma ona folasia uma i le Tala Autu o le Tupe lea na tatou pasiaina ia Iuni. A o le avanoa taua lea e toe fetuunai ai tupe maua ma tupe faaalu a Matagaluega ina ia ave le faamuamua i mea e tatau ona ave i ai le faamuamua i nisi o galuega e tatau ona faatino. O lo o faapea nisi e le o se Tala o le Tupe Tele. E sao, a o avanoa nei e fetuunai ai vaegatupe a Matagaluega ina ia fetuunai galuega e tatau ona ave i ai le faamuamua.

A o le itu e taulai i ai lenei usugafono, o faiga faavae e tapena ai le Tala Faatatau o le Tupe. Faafetai i lau Afioga i le Minisita o Tupe ma le Matagaluega o Tupe, o lea e matau atu o lo o sosolo lava le tatou Malo i faiga faavae sa sau ai i le tapenaina o Tala o Tupe.

Na pau lava le faiga faavae lea e fia fai i ai se tala, o le faiga faavae lona lua, lea e faapea mai; totogi o tagata faigaluega ia faatumauina i totonu o le 35% o tupe faaalu mo galuega faatino, e le 80%. Afai o lea ua uma ona tele tala i lenei vaiaso i la tatou galuega fuafua mo le review ina o le workforce plan, o mea e masani ona fai a atunuu i lea taimi ma lea taimi, e lauliliu po o talafeagai le aofai o tagata faigaluega, po o talafeagai a latou skills, po o talafeagai tomā o lo o manaomia e lo tatou atunuu aua le atiaaina o le tamaoaiga. O le mea foi lena e lagolagoina ai le review ua toe fai nei, aua o mea e tatau ona fai, o mea e fai e atunuu uma o le lalolagi. A o lou atugaluga, o le faiga faavae lea lona lua. Afai o lea ua uma ona i totonu o le Tala Faatatau o le Tupe totogi o tagata faigaluega ina ia le i lalo ifo o le 35% o tupe o le Tala Faatatau o le Tupe e alu i totogi o tagata faigaluega, a

o lea o le a taofi, o lona uiga ua tatou le ausia le faiga faavae lea, aua o lea ua le faaaogaina uma le tupe sa faaagaaga mo totogi o tagata faigaluega.

Na ona tuutuu atu faapena so matou manatu, ae lagolagoina le review. A o le fautuaga pei ona fautua foi e nisi o sui usufono, faagasolo le galuega, faagasolo le galuega, ae aua ne i taofia le faafaigaluegaina o tagata faigaluega, ina ne i amo e se vaega toaitiiti le galuega. E faigofie lava ona fai ma toe fetuunai pe a maea le review.

Afioga Hon Tuala Tevaga Iosefo Ponifasio (Sui Palemia): Pe maua se avanoa lau Afioga i le Fofoga Fetalai.

FOFOGA FETALAI: Ia, malie lau Afioga i le sui usufono mamalu se i tuu atu le avanoa i le Sui Palemia. Saunoa mai lau Afioga i le Sui Palemia.

Afioga Hon Tuala Tevaga Iosefo Ponifasio: E faatalofa atu i lau Afioga ma le paia maualuga o le Maota i lenei taeao. E faamalo atu foi i le sui usufono o lo o saunoa.

E saolele le saunoaga i le tulaga o le tatou 80%, ia e sese le fuainumera na tuuina atu ai i le aso ananafi. Ae masalo o le fuainumera po o le pasene lena o lo o e taua, i se taimi ona faamanino mai lea e le Minisita o Tupe le tulaga lea. Aua e i ai lou talitonuga o se mea i le 39 i le 40% le tulaga lea o tupe o lo o alu i totogi o le aufaigaluega a le Malo.

Ae ua ou tulai atu lau Afioga i le Fofoga Fetalai, o le naunautaiga lava ina ia manino le faaaogaina o upu, sa ou tulai atu ananafi ma ou faamalamalama foi le tulaga lea, e le o taofia le aufaigaluega a le Malo. O le mea lea o lo o i ai le popolega lau Afioga, ona o lea foi ua saunoa mai le sui usufono ua taofi galuega.

O le faamaninoga o le mea lea lau Afioga i le Fofoga Fetalai, e le o taofia galuega, o lo o faasolo pea galuega a le Malo, o lo o malu foi galuega a le aufaigaluega a le Malo, a o le iloiloga, o le toe teuteuga ma le faasaosaoga o le alu i luma. O se taimi ona avatu lea o se auiliiliga o le tulaga lea, ae malie mai lena Itu, e le o taofia galuega a le Malo. Ia o le talosaga lea lau Afioga i le Fofoga Fetalai. Ma le faaaloalo lava.

FOFOGA FETALAI: Malo faafetai. Atonu o lea ua manino lea itu leaga o lea sa lagalaga foi e le tele o sui usufono. O lea ua saunoa manino le Sui Palemia e le o taofia o lo o faagasolo pea a tatou galuega.

Tulai mai le sui usufono mamalu.

Afioga ALIIMALEMANU MOTI MOMOEMAUSU ALOFA TUUAU: Faafetai i lau Afioga i le Sui Palemia. Faafetai o lea ua maua atu e le o taofia. O lona uiga, o lea na ona taofi o le faasalalauga o avanoa mo le taimi nei. E pei o le mea lena o lea e taumafai atu ai, ia faasalalau pea. O

lea e malamalama e le o taofia galuega, a o le faasalalauina ma le faatumuina o avanoa, o le mea lena o lea e taumafai atu ai. Ae ui i lea, o lena e i ina le tofa, o lena foi e i ina le pule. Ia, o le taumafai atu, e tele auala e toe fetuunai ai mulimuli, ae o le a see ese.

Oo mai se tala i aoaoga. O le mea a lea ou te mimita ai i le sui usufono o le Alataua Sisifo. Aua a oo loa ina aumai tofiga a le Malo, na ona omai lava punouai loa e fai se sao o le itumalo i totonu o le tamaoaiga o le atunuu. O le faamuamua lava lea a so o se atunuu, o le tapenaina o fanau e faaaauina galuega ia tatou te faia ma atili faaleleia atili aua le manuia ma le saogalemua o le tatou atunuu. O lea ua ova i le 20 tausaga talu ona faatuina le tatou Iunivesite i le Papaigalagala, ua tele foi le aufaigaluega ua maua avanoa e faalautele ai lo latou tomai ma siitia o latou faailoga maualuluga. O se manatu, pe ua le alagataua loa ona tatou mafaufau e saili ni fesoasoani mai fafo mo le upgrade ina o le tatou Iunivesite, ma ave se vaega tele mo le capacity building o le aufaigaluega faiaoga a le NUS ina ia siitia le tulaga, siitia le standard, siitia le requirements a le Iunivesite.

O le auga o le manatu, ina ia mafai ona tatou tali atu i ni avanoa mo le faatupulaia ma le siisii pea i luga o le aofai o le tatou atunuu, le growing population. E ave pea le avanoa i fanau e aooga ai i atunuu i fafo, specialize courses e le o mafai ona aoaina iinei. Ae o le auga o le manatu, ia i ai avanoa mo le lautele o le atunuu ona ua tuputupu pea le faitau aofai o tatou tagata.

Mo se faaitaiga o le Bachelor of Science, e le na o fomai latou te manaomia le course lea, e mafai foi ona maua avanoa mo nisi tama fanau a le tatou atunuu. O lea tatou te malamalama lelei lava na o e lava e maualuluga maka e ave i fafo, ae ia maua nisi avanoa mo a tatou fanau e aooga atu ai iinei e faalautele ai le tomai, e fesoasoani i le workforce plan review lea e fai.

Ona oo mai lea o se tala i avanoa sikolasipi. O lo o ou maitauina pea talu ona oo mai le Maota i le 5, 6 tausaga talu ai, i le vaegatupe foi lea e \$3.2miliona le sao o le Malo mo avanoa sikolasipi. E totoe lava tupe i le va o le \$300,000 i le \$400,000 i tausaga taitasi e le faaaogaina, a o lea e toatele nai fanau, nai fanau a matua e le o mafai ona aooga ona e le lava le tamaoaiga e faatupe ai pili. O lea e i ai se manatu o lea ua ou maitauina ua amatamea nisi o Ofisa Sili o Pulega o tatou Faalapotopotoga ma Matagaluega. Faafetai o lea ua amatamea latou, o lea ua mafai ona fai atu le Bachelor of Engineering lea ua amata nei i le Semester lenei i le NUS. E le o se avanoa lelei loa lenei lau Afioga i le Minisita o Tupe, e aveane se vaegatupe lea pe \$300,000 i le \$400,000 e faaagaaga mo i le Bachelor of Engineering lea ua amata i le NUS e faaaooga atu ai a tatou fanau iinei e lelei e taugofie, o lea e nonofo lava i nei i le tatou atunuu ma galulue ai. O lea foi e i ai tatou avanoa sikolasipi ia e aumai e Niu Sila ma Ausetalia i lalo o galuega ia fesoasoani tuusao lea pe lata i le \$10 miliona lea e

faaaauai ai sikolasipi ma aumai ai foi sikolasipi fou. Lea sa maua i se tasi o saunoaga e maitauina ua toe tuu lava ia Niu Sila ma Ausetalia le filifiliina avanoa o sikolasipi, ua tau leai so tatou leo i totonu o avanoa sikolasipi nei. E fautuaina ai le Matagaluega o le Va i Fafu, se i toe fetuutuunai a tatou faiga paaga ina ia i ai pea lo tatou leo i totonu o le filifiliina o avanoa sikolasipi lea. Lea e maitau atu le mea lea e mananao ai a tatou paaga, ia toe goto lava le tupe i totonu ia Ausetalia ma Niu Sila. Na ona aumai lava e latou piki atu tamaiti o atu, e leai se tupe o sau i totonu ia tatou.

O se tuualalo i le Pulega a le NUS, vaai ni a tatou partnerships mai Iunivesite la e i fafo, fai ni a tatou partnerships ma isi Iunivesite i Niu Sila ma Ausetalia, ina ia faaaoga atu fanau iinei i le NUS. O le auga foi lena o le manao ina ia upgrade le NUS, aoga atu fanau iinei, faaaoga mai a latou resources i fafo i faiaoga, goto ai le tele o le latou tupe, a ia sau sina tupe laitiiti iinei mo pili o tatou fanau aoga.

O a tatou avanoa ia sikolasipi lea e ofoina mai, atonu e lelei i se isi itu, e tuutiitia ai le faitio ua ave fanau a sui usufono i avanoa sikolasipi. Ae pau lava le popolega ua leai se tatou leo tele i totonu o le filifiliina o nei avanoa. Ia, ona oo mai lea o se tala...

Afioga Hon Toeolesulusulu Cedric Pose Salesa Schuster (Minisita mo Punaoa Faalenatura ma le Siosiomaga): Lau Afioga i le Fofoga Fetalai...

FOFOGA FETALAI: Faamalie le sui usufono se i tuu atu le avanoa i le Afioga i le Minisita mo Punaoa Faalenatura ma le Siosiomaga.

Afioga Hon Toeolesulusulu Cedric Pose Salesa Schuster: Faafetai lava. E faatalofa atu ai i lau Afioga ma le paia ma le mamalu o le tatou Fonousu i lene taeao. Ae ona e faalogologo atu i le saunoaga a le tamaitai sui usufono, e faapea ua i ai ni tuuaiga ua ave fanau a sui usufono i sikolasipi.

E fia maua sina malamalamaaga po o le a tonu le auga o lea... po o ai sui usufono ia ua ave a latou fanau. O si ata fanau e totogi lava e ita ona e dual citizen. A o lea la atonu e i ai nisi ua faia ia tulaga. Ia, e taua foi mo le tatou Malo lau Afioga. Afai ua i ai ni tuuaiga ma ni vaega faapea e ao ona toe silasila i ai le tatou Malo. Faafetai.

FOFOGA FETALAI: Ia, masalo o faafofoga mai le sui usufono mamalu. E taua tele foi le fautuaga a le Minisita, aua, leaga o lea e tuuaia ai le tatou Maota nei. Ia, o silafia foi e manaomia tatou faamaumauga pe a oo ina tatou sailiili loloto atu, ae lelei lava le faamanino o le saunoaga e faapena ona manino ai foi le tatou Maota.

O le isi itu lau Afioga i le sui usufono mamalu, o oe o se tasi o sui usufono o le Komiti. E i ai lava le manatu o se taimi saunoa lo outou Taitaifono, aua o nei lava mataupu o lo o faatinoina e la outou Komiti. Ia na o nai manaoga o si outou itumalo, a o la outou Lipoti, ia atonu o se taimi saunoa le Taitaifono ona... O le manatu foi lele i le faaaogaina o le tatou Taitaifono o lo o galulue i le Komiti.

Afioga Hon Loau Solamalemalo Keneti Sio (Sagaga 1): Lau Afioga i le Fofoga Fetalai, pe maua se avanoa?

FOFOGA FETALAI: Ia, se i tulai mai le sui usufono mo Sagaga 1.

Afioga Hon Loau Solamalemalo Keneti Sio: ia, o se mea e fia faamalamalama atili e tusa ai ma le saunoaga a le sui usufono o lo o saunoa nei e fesoasoani atu ai foi, leaga o lea na te laga foi ni mataupu ua faapena ona maea ona faatino. O le taimi foi sa ou i ai, ia na faapena ona fai partnership a le tatou Iunivesite foi le NUS ma Iunivesite i fafo i Niu Sila ina ia malamalama le Maota. E le fou la le mea lea, ua uma ona faatino. Ia ma le tulaga o tupe ia faapea o tupe a... ia e pule lava Sitafune i le la o lona vaa. E pule Niu Sila i latou tupe, e pule foi Ausetalia i latou tupe.

O le agaga lena ina malamalama le Maota. Ma le agaga faaaloalo.

FOFOGA FETALAI: Ia, atonu ua aoga foi le sao o le sa nofoia foi le nofoa o le Minisita o Aoga, ia, atonu e fesoasoani ai foi i le sui usufono a o saunoa.

Ia se i tulai mai le sui usufono mamalu, o lea ua e faafofoga mai.

Afioga ALIIMALEMANU MOTI MOMOEMAUSU ALOFA TUUAU: Faafetai mo le avanoa. Ou te talitonu o avanoa nei e lauga faalauaitete ai sui usufono i le tamaoaiga. Ou te le o taea lava le Komiti Tupe, o lea e afio le matou Taitaifono o ia e tali atu i ni faafesili. O lo o taumafai atu pea se lagona o lenei itumalo i le tulaga aoaotele lau Afioga i le Fofoga Fetalai. A o se upu foi ua fai agai i avanoa ua ave i fanau a sui usufono, o le tulaga lena sa i ai lou oo mai i lea Paeaiga, sa ou faalogo i ai i faitioga, lea e faalauaitete ai le tala. Ou te le o fai atu a mea o le taimi lenei aua o lea ua sui le faiga. A o lea na fai atu ai se tala, atonu e aoga foi le ave sao loa ia Ausetalia ma Niu Sila e faaitiitia ai ia faitioga.

Ma le faaaloalo lau Afioga.

FOFOGA FETALAI: Ia, e lelei le fesoasoani atu le sui usufono mamalu, atonu ua taua foi, o lea ua e saunoa sa e faafofogaina ma e faalogoina. Ia o le uiga lava lea o le tatou Maota nei, e manaomia lava tatou tala faamaoni ma manatu o lea na vaai tino ma i ai mau. Silasila foi le

Palemene, e tutusa lava tatou ma le Faamasinoga, tatou te le faaaogaina ni tala faalogo, leaga e umi ai le tatou taimi ae le tatau ona tatou faaaogaina. O le mea lea, le sui usufono mamalu, ia, ou te talitonu ua e tau maua mai le agaga o le Nofoa, ina ia faapena ona faamanino pea a tatou lauga faalauaitete, aua lava le faafogafoga a le Maota ma le tatou atunuu. Ma le agaga faaaloalo.

Tulai mai le sui usufono mamalu.

Tofa Hon Tuuu Anasii Leota (Siumu): Lau Afioga i le Fofoga Fetalai...

FOFOGA FETALAI: Ia, le sui usufono mo Siumu po o i ai se fesoasoani i le...

Afioga ALIIMALEMANU MOTI MOMOEMASU ALOFA TUUAU: Ioe lau Afioga, o si mea sia e fia malamalama i ai, o le saunoaga a le sui usufono i mea ia o sikolasipi, ua leai se leo o Samoa i sikolasipi ae pei ua faatino lava e Niu Sila ma Ausetalia. Ae faafesili atu i le sui usufono pe na ia sailiilia o le a le mafuaaga? O le a le mafuaaga ua ala ai ona toe see ia Niu Sila ma Ausetalia le faatinoina, a o lea na lafo mai ia tatou e fai e tatou le faaiuga mo tamaiti e ave i fafo? A o la e pei ua fai isi suega, e ese maka e fai i inei, ua le faaaogaina, ae pei ua faaoga isi suega e aumai Niu Sila, lea la e i ai nai tamaiti ia e toe sue atu i i, ua le maua ai avanoa, ae sa tetele maka e tatau ai ona o e sikolasipi.

Ae ou te faafesili atu la i lau Afioga i le tamaitai sui usufono i le saunoaga, pe ua sailia po o le a le mafuaaga ua ala ai ona toe ave ia Niu Sila le malosiaga ma Ausetalia, ae le taoto pea ia tatou. Ma lou faaaloalo.

FOFOGA FETALAI: Ia, atonu e aoga foi le faafesili a Siumu mo le sui usufono mamalu e faalautete ai lou finagalo.

Afioga ALIIMALEMANU MOTI MOMOEMASU ALOFA TUUAU: Ia, lau Afioga i le Fofoga Fetalai, ou te talitonu e le o ia te au le atoatoa o le tali, o lo o i ai le Minisita e fitoitonu ma lea matafaioi. Ae i sailiiliga i le Matagaluega o le Va i Fafo lea e mafua ai se tala ina ua fesiligia pe o le a le mea ua fai sao ai e Ausetalia ma Niu Sila a latou selection. Ia o le ala lea o le faamatalaga ae sili pe a aumai sao pea i le Minisita lea tulaga lau Afioga.

Ona oo mai lea o se tala i a tatou taligamalo i fono tele a Faauluuluga o Malo o le Taupulega, e matau atu e le o aumaia lava i tatou Tala Faatatau o Tupe se tapenaga mo a tatou fono tele ia i lea tausaga fou. Ae atonu o le galuega tonu lea a se task force ua filifilia. Ae na pau lava sau fesili, pe

auala la tatou taligamalo, ae po o le a foi le isi a tatou option pe a faapea e le auala lea tulaga ma le taimi ona ua utiuti.

Ona oo mai lea o se tala i le poloketi mo itumalo. Faafetai i le Minisita faapea le Komiti mo le faamaoti maiga o faiga faavae o itumalo mo le faaaogaina o tupe, aua o mea lava na e faataua lava i lou sui usufono, o faiga faavae aua le faaaogaina o tupe o poloketi.

O le auga atoa o lenei faamoemoe e pei ona sa saunoa i ai le Minisita o Tupe, o le faamaiteina o le faatupulaia o le tamaoaiga. E pei ona i ai le Tala Autu o Tupe, le faaautu o le Tala Autu o le Tupe. O lea tatou te naunau ina ia faataavale le tupe aua le faagaoioiga o le tamaoaiga i se taimi vave, ae paga lea, o lo o i ai foi nisi o vaega o lo o to'a ai le tatou galuega.

O le tuualalo i lau Afioga i le Taitaifono ma le Komiti, tau talatala malie nisi o faiga faavae na e leai se sootaga tele i le faaaogaina o mea tau tupe. Ave le faatuatuaga i galuega a le au suetusi o e ua i ai le tomai latou te lipotia mai ai le sao ma le faaaogatatau o tupe a le Malo. O lea tatou te mananao ia gaoioi le tamaoaiga ina ia toe fua mai i se taimi vave, ae a tuai, ia o lona uiga o poloketi na fuafua e uma i le \$850,000 e uma ae ua oo i le \$1miliona ona o lo o alu pea i luga le tau o oloa, le tau o le soifuuga. A o se tuualalo lena.

Ua ou taua galuega faa-suetusi ona o le poloketi a le itumalo. O lea e matau atu o lea e i ai le \$130,000 lau Afioga i le Minisita o Tupe i le sueina o tusi o le poloketi a le tatou Malo. Ona ou fesili ai lea; o fea ua i ai le gasologa o le tatou forensic audit mo le suesueina o le malaevaalele i Tiavea ma nisi o poloketi. Manaia ae faatopetope ia galuega, faamatuuese atu ia galuega tuua ae tatou agai i luma e atiae lo tatou atunuu.

Ona faaiu lea o se tala lau Afioga i le Minisita, se i e tagai ane lava i faamaumauga a le Matagaluega ma le Afioga i le Minisita o Tupe talu ai, po ua ave ea se proposal i se donor mo le faleaoga o le itumalo o Alataua i Sisifo? Na pau lava lena o le manao o lenei itumalo.

Ia, ua uma atu se tala lau Afioga i le Fofoga Fetalai. Ae ave ai lenei avanoa e momoli atu ai le faafetai tele i le tapuaiga a si o matou itumalo o Alataua i Sisifo, faafetai mo le...

FOFOGA FETALAI: Ia malie le sui usufono se i tuu atu le avanoa i le Minisita o Galuega Tetele.

Tofa Hon Olo Fiti Afoa Vaai: Sa taumafai atu lava sina...e fia faamalamalama atili ma faasao, ae sa tapuai lava le lauga a le sui usufono. Ona o lea sa taua le tulaga o le tatou Bachelor of Engineering foi lea faapea o le NUS, e na o sina mea fia faasao. O le tulaga lena o lea ua amata mea mai ai ia le USP, le Iunivesite o le Pasefika, e taua atu i le faamaite foi a le Pulega o Felauaiga o le Laueleele. Ma le faaaloalo.

FOFOGA FETALAI: Faauma maia lau saunoaga o lea ua maua mai le agaga o le Minisita.

Afioga ALIIMALEMANU MOTI MOMOEMAUSU ALOFA TUUAU: E sao lelei le Minisita, ua sese atu le tala, o le USP lea ua amata ai le polokalame lea, faafetai i le Ofisa Sili o lau Pulega, mo le taimua i ia galuega lelei, aua e le gata mo i latou ae manuia ai fanau a le atunuu.

Avea lenei itula e momoli atu ai le faafetai i si o matou itumalo, faafetai i lau tapuaiga, agalelei tele le Atua i lo tatou itumalo. Le tapuaiga a Samoa, agalelei le Atua, ia folau i lagima le sa o Samoa. o le matou tala lea ma le faaaloalo, ia manuia lau afioga i le Fofoga Fetalai, ia manuia foi sui usufono. Soifua.

FOFOG A FETALAI: Faafetai saunoa i le sui mamalu, fetai lelei lou taimi i le saunoaga. Ia malo foi faaso, maua foi le fesoasoani mai i le tatou faigamalo aua le atinaeina o le atunuu, malo faafetai. O le avanoa lenei o se tasi o sui usufono. O lea ua matau atu ua fou mai le sa o le Vaa o Fonoti.

Tofa MAUU SIAOSI PUEPUEMAI (Vaa o Fonoti): E momoli atu le agaga faafetai tele i lau afioga i le Fofoga Fetalai, e tusa ai foi o avanoa matagofie ua tuuina mai foi i lenei itumalo. E fai ai foi se sao aua foi le Tala Faaopoopo muamua o le tupe e pei foi ona folasia i lumamea nei. E piiama se lagona e tusa ai ma le taulaga siitia ma le taulaga molia, aua o lea ua uma ona e faausu le gafa, aua lo tatou va tapuia ma le Atua. E momoli atu ai le agaga faafetai tele ma le agaga faamalo. Aua o le upu moni lava, ana le seanoa le Atua tatou te le maopoopo ma umufono talatala i lenei foi taeao fou. O le taeao manino o le taeao totoa, o lea ua tatou vaaia le faamalumu mai o ao o le lagi. O le faailoga o le faamanuiaina, e le gata o laufanua o le tatou atunuu, ae faapea foi ona faamalu le Maota fonu o Samoa e pei ona i ai lenei taeao. O le viiga o le Atua e le faaitiitia.

A o le i folasia se vaivaiga o lenei itumalo, ou te muai faatalofa atu i lau Afioga i le Fofoga Fetalai o le Maota. E faatalofa foi i le afioga i le Sui Palemia, aemaise o le mamalu o Afioga i Alii ma Tamaitai o le Kapeneta. E faafeiloai atu foi i le Minisita Lagolago, faapea foi le afioga i le Sui Fofoga Fetalai. E le itiiti foi se faamalo e faafeiloai atu ai foi i le Afioga i le Sui Taitai o le Itu Agai aemaise o sui mamalu uma o le Vaega Faaupufai o le HRPP.

E le laaloa foi se vaai lau Afioga i le Fofoga Fetalai, si matou vaega toagaogao, malo le soifua manuia, malo le soifua maua i lenei taeao fou.

O paia o Samoa, e i ai le manatu o lea ua maea ona e paepae faatuma o lagimalofie, ma e le toe oo foi i ai se leo o lenei itumalo. A o le i folasia la se lagona ma e ao ona ou pai i si ou itumalo. Le itumalo o le Vaa o Fonoti, aua le afio o Ulualofaiga ma le Matua o Talamaivao, le paia o le Aiga Sa

Levalasi ma le Aiga Sa Fenunuihao, le mamalu i le tofa, o e na taitai, aemaise Atua le Fauono ma le lavalaoa o lou itumalo. E le faagaloina foi le tapuaiga malu i le susuga i le tama toeaina, o le taitaifono foi o tama o le ekalesia aoao, le susuga ia Asotasi ma le faletua ia Savalina, aemaise le paia maualuga i le susu ai o susuga i fuesinasina o le Talalelei, o lo o faapena ona nofia i si ou itumalo i ekalesia eseese. Ia tapuai maia, se i fai se leo o le tatou itumalo aua foi le Tala Faaopoopo o le Tupe.

O le tala a le isi fatu pese, o le pese lava e masani ona ou pese ai, e pau lava nai suiga, ia o nota ua fetuunai. Afai sa umi na ou pese ai i lau lauga faataupou i lena tausaga ua alu, o lea o le a taumafai le vaa e faapuupuu.

O lea o le a ou amata atu i le Minisita o Siosiomaga, talitonu o lea ua alu lea tausagsa aemaise foi o lenei masina o ou oo atu lava i lou ofisa ma ou tuitui, tatala mai ma ta faaso. O le matou itumalo lea o Fagalaoa, e silafia lelei e le Maota, e lumafale i le moana ae tuafale i le mauga. Ua tele le afaina o afioaga o si ou itumalo, aemaise lava le siitia pea o le suatai. E i ai se tasi o aiga ua valaau mai e tautuana lau afioga i le faipule, a pau lava ia o mea e te logologo puialii ai i le tatou Malo, ia faamanatu pea i lau Afioga i le Minista, o lea foi ua e oo atu ma e silasila i gatai fale o si ou itumalo, ia o le aafiaga tele lava lena o lo o i ai. Ona lava o le itumalo e totoa ma loto tetele, mauaa i le Atua o le ala lea o le mausali pea ma nopiai pea i lo latou faasinomaga, leaga e faigata o eleele lava sa soifua ai le tele o afioaga. Ae talitonu o lena ua taoto i ai, o lea foi ua e faaso mai, o lea o le a amata ai galuega o lenei foi tausaga fou, ia o lau pule lea, malo faafetai.

Ona ou oo mai le i le Minisita o le Soifua Maloloina, ia o la lava e faafogafoga mai si ou itumalo. Ia e talitonu lava o lo o utiuti le faaso, o upu foi e masani ai, e le i fauina Roma i se aso se tasi. O lea foi faatoa tulai mai le faigamalo, o lo o tau faasoaso foi le seleni aemaise o le tele o le pagatia sa i ai si o tatou atunuu i le tulaga sa i ai le Koviti, ae talitonu o lea ua toe faasolosolo manuia ia le faamoemoe aemaise o lona atinae. Ia matou nonofo tatalo pea, ia maua lou soifua laulelei, aemaise o le tofa maualuga e au mai ai lau faaso mo lenei foi itumalo, i si o matou falemai. O le mea lea e momoli atua i le faafetai tele e tusa ai ma tulaga sa ta talanoa ai, o lea ua fiafia si o matou itumalo e tusa ai foi ma lau saunoaga.

FOFOGA FETALAI: Malie le sui usufono mo Vaa o Fonoti, sei tuu atu le avanoa i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: Malo faafetai manaia le lauga Fagalaoa, ua ou tulai atu ina ia vave ona pipii atu e tusa o le talosaga e pei ona i ai foi i le la Tala o le Tupe. E pau lava le mea sa ou talanoa ai i lau Afioga e faamanino nai vala, ua leva ona i ai le falemai o lo outou itumalo, o mea manino ia e tataua ona tau atu, faafogaga Samoa. Ou te tulai atu ua i ai le falemai, ona ou asiasi lea i ai, talofa e, ua

cover atoa e le vao e le faaaogaina. Na ou sailia le tender sa ou fesiligia le Taitaifono. E pei lava ona ou fai atu lau afioga ina ia manino. Na e talanoa loa i le falemai, na ou taumafai loa e galue, ona ou te iloa o Fagaloa e tu ese lava, ona ou te iloa o tagata soifua o lo o soifua ai. Ae ou alu atu o lo o i ai le falemai fou lava ua uma ona fai. Sa ou fesiligia le Ofisa Sili o Pulega aua o le Fagaloa masalo o faafofoga mai. O le a le mea ua cover atoa ai e le vao le fale fou, ae tuuai i le faipule sa i ai. Ou te le taua lava o lea e i ai tulafono o le Maota. Ae ia e manino lau afioga i le sui mamalu, sa fau i le fanua o latou nei le fale manaia lava, ae le i faaaogaina talu ona fai, ua tuuai i le sui sa sai. Ona ou sau lea fai sailiiliga, e ova ma le tolu selau 300 afe tupe na faaalu i le fauga o le fale lea. Lau afioga i le sui mamalu, ia e faafofoga lelei mai, e le o moe le Minisita i le sailiili se manuia mo lou itumalo, leaga o tagata soifua e tatau ona oo i ai le fesoasoani. Ma le isi mea, o Fagaloa e motu ese lava, ae aua e te popole, o lea ua i ai fuafuaga, ae pei ona ou faamatala atu, o le a e lailoa e sasa le falemai, ae ua leva ona faatu le falemai ae le faaaogaina. Omai lea o isi konekarate sa fausia ua avatu nisi mea tuai mai isi mea, talai mai isi mea fau ai le fale. E na ona ou faapena atu, e pau... e le o se talaole lea e avatu i le Maota lenei. Na sau le savali a Maasina, fai mai pe mafai ona latou faaaogaina o se falekomiti. Sa ou fai i ai, e malilie o meatotino a le Malo, pe tu lava i Maasina o meatotino lava a le Malo ona sa alu ai tupe a le Malo. O le faamaninoga lea lau afioga i le sui usufono, o lea ua e manino ma e malamalama o le taua o le tau atu i lau afioga, o ia sui usufono sa i le la Itu, sa fai malo, ae o le mea ua tupu, e le o manino na mea. Ae o lea ua fai sailiiliga a le Minisita ma le Matagaluega, ae aua e te popole o le a i ai se fuafuaga faapitoa mo Fagaloa. O la e faafofoga mai Fagaloa e taua tele. O le tali atu lea ma le malamalama, ae aua e te toe talanoa i le falemai lena, leaga ua oti atoa tupe na faaaoga ai. Ia manuia le aso.

FOFOGA FETALAI: Malo saunoa i lau afioga, ia tulai mai le sui mamalu o lea ua maua mai le finagalo o le Minisita o le Soifua maloloina.

Tofa MAUU SIAOSI PUEPUEMAI: Ia faafetai i lau afioga i le Fofoga Fetalai, faafetai foi i le saunoaga malamalama a le Minisita o le Soifua Maloloina. Le tatou itumalo, o lena ua outou faafofoga mai i le saunoaga manino, patipati ifo lava oe i lou maota ma lou laoa o lea ua manino le saunoaga a le afioga i le Minisita. E masalo a le o le faaiuga o lenei tausaga, o le amataga o le tausaga fou o le a fausia ai so tatou falemai fou. Ia e leaga o le tamaloa e aulelei, na te faia foi mea lelei aua le soifua maloloina o le tatou atunuu ma le tatoua itumalo. Ona ou faasee atu lea i le afioga i le Minisita o Faatoaga, e pei foi ona saunoa nisi o sui mamalu, o le manulauti lava lea, lau afioga o le atinae lea o laufanua o lo matou nuu.

FOFOGA FETALAI: Ia malie le sui mamalu o le Vaa o Fonoti sei tuu atu le avanoa i le sui usufono o Anoomaa 1.

Afioga Alaiasa Moefaauouo Malagaitutogiai Sepulona Moananu: O le saunoaga a le sui usufono ua talanoa i falemai, lea foi ua faalogologo ma le totoa i le faaaliga a le Minisita, o le mea moni la o lea e tupu i le taimi lenei, ua matua tigaina lava le falemai o lou itumalo i tagata nei. O le mea moni la lea o lea e tupu. A o le saunoaga a le Minisita, e pei o lea e faailoa mai ai o le lape o le Itu lenei na faaalu leaga ai tupe, ta te tau matau atu lava i le saunoaga a le Minisita. Ae lau Afioga i le Minisita, a faapea lava e te suesue atu e i ai ni mea faaletonu na fai e tagata na, ave i le tulafono. Ae le faapea o le Itu lenei na mafua ai le mea, ona tuuai atoa ai lava lea o le matou Itu, e leai e i ai lava mea e tutupu, a avatu lava i tagata e faaletonu e faia mea e faaletonu. Ae a fai ua silasila ifo lau afioga, o ni tulaga faapena na fai ai le fale, ia molia i le tulafono. Ma le agaga faaaloalo.

FOFOGA FETALAI: Atonu o lea foi ua manino le faafofoga atu a le afioga i le Minisita. Sei saunoa mai lau afioga i le Minisita o le Soifua Maloloina.

Afioga Hon Valasi Luapitofanua Togamaga Tafito Selesele: E ese le manaia o le tuualalo a Lufilufi, e pei ona manaia i le saunoaga a le sui o Siumu i lana faafetai faapitoo ia Lufilufi ona o tootoo o Samoa. O tootoo o Leaava ma tootoo o le Manino, o tootoo e malu ai Samoa. ia faafetai Lufilufi, afai ua tumu lou falemai, o Samoa e sulu atu ia te oe. E le soona faatalale Lufilufi ia Samoa, leaga o le Lufilufi o le Tumua, o ia na te vaaia Samoa atoa. Ae pau o le mea faamalulu atu Lufilufi, ou te le o... e pau lava lau tala sa fai, o e falemai lea, sa fausia i le taimi o lena faigamalo. Ma ua manino lau tala lea, afai e fia... e lui atu ia Tuisamau e o e vaa le falemai lea ou te fai atu ai, o la e tu i le aso, ae ua vaoa atoa e leai se mea o faia tali ona fai. E lei oo foi i ai se fomai po o ni teine fomai e galulue ai. Ae o le mea e sili ona taua o lea ua tagitagi mai le sui usufono, Fagaloa aua e te popole, e pei lava ona ou fai atu, o lo o soifua le Atua. Po o le a le vaivai o le Minisita ma le Matagaluega aemaise foi o le Malo, e taumafai lava ina ia faaso manino. O nai mea la ia o lea e vailiili lelei, ia mea o lo o i ai nai faaletonu, ae fai e le toalua toatolu, ae ua **victimizes** ai le atunuu, i a po o Fagaloa, i le leai o se mea e tua i ai, ae o lea ua tua ia Lufilufi, e leai o ou eleele ma ou aao e malu ai so o se tagata puapuagatia, aua la e te faatalale i lou tofi. O le tali atu lena Lufilufi.

Afioga Alaiasa Moefaauouo Malagaitutogiai Sepulona Moananu: E faafetai ona o lea ua e toe taua, leai o lau tala o la ua tumu ai le falemai. Sa ou faapea e faapea mai le Minisita o le a faatele lou falemai leaga ua tumu.

O la e silafia lelei e le Minisita e le o se falemai tele foi, ia le falemai o Lufilufi. Ae o lea e talia lava so o se isi e amata atu lava i le alu atu i Anomaa e tau i Aleipata, e talia so o se tagata e leaga o au e tausia uma le vaega lea. E i ai le mea lea e fai mai o le tootoo o Leaava, tootoo o le Manino, e leai o lea mea sao lava lea na ou tu ai, i lau tala sa fai i nai ou uso ia, o le tootoo faataitai leoleo mamoe faale-Atua. O le mea lea e eseese ai le tasitasi faalelalogagi ma le faale-Atua. O le faale-Atua pe alu lava le mamoe e tasi, e alu lava e sue mai, e alu lava e sue mai, a o le taitai faalelalogagi, na ona sese lava kiki loa i fafo ma toe o e fai le palota. Ma le faaaloalo.

FOFOGA FETALAI: Tulai mai le Minisita o le Soifua Maloloina.

Afioga Hon Valasi Luapitofanua Togamaga Tafito Selesele: O nai vala ia e fia faamanino aua ne i faaseseina le faafofoga a le atunuu. O le saunoaga a le sui o Lufilufi, e moni ma faamaoni, leaga o Lufilufi le isi falemai na faitau i ai le toe...o lea sa ma fetuunai ma le... o lo o i ai le faamoemoe a le itumalo ina ia saili se eleele i uta, o lea e faafofoga mai le... sa ma fai upu ai. Ae tasi lea falemai aoga tele mo le faasologa, gasologa o le atunuu. Aemaise o lo o lata i ai le kolisi faafaiifeau e fai si kele. O le ala lea o le talosaga atu, o ia lea sa saunoa mai lana afioga, a taumafai le itumalo e saili se vaega eleele i le itu i uta, leaga ua fai lava si leaga o le mea o lo o tu ai ma pumoomoo le... ou te iloa o lea o lo o taofi e le sui usufono le ma feiloaiga. O le faamalamalamaga lea lau afioga, e le o se vaai faatamala, ae o tulaga o le itumalo ma eleele e fausia ai le falemai. Ae malo faafetai Lufilufi mo le galuega, o lena foi e tapa e Lufilufi tupe o fee o mai e... ua taua tele, faafetai.

FOFOGA FETALAI: Malo faasoa atonu ua manino lea vaega, faaauau mai le saunoaga Vaa o Fonoti.

Tofa MAUU SIAOSI PUEPUEMAI: Ae ou te le i faasee ese la ma le vaega lea, ou te fia tali atu lava i le saunoaga a lou uso a sui usufono. Aua e uso Anoamaa ma le Vaa, o lea sa saunoa faapea ua tumu le falemai o Lufilufi, o lea foi sa saunoa o lona tootoo o le tootoo faaleoleo mamoe, ona talu ai lau afioga i le Fofoga Fetalai ma le Maota, o au o le tiakono toeaina. E i ai le mataupu silisili o lo o matou tauaveina nei, aua o le mau lava lea faatiakono toeaina, o se vai e asu mai i ou lima e ola ai se isi o ou uso, o le viiga sili lena i le Atua. Ou te le iloa pe ua oo i ai le sailiiliga a le taitai mamoe. Ae ui i lea lau afioga, a le Minisita o Faatoaga, o fea lava e i ai le faanaunautaiga a lo matou itumalo i se matou ava mua, o lo o ua galulue punouai si o matou itumalo. E mo le silafia foi, o le laau lea, e eseese mai laau uma lava, e pei o le faatoaga i Etena. E pau lava lea o le laau e faitau i

le tolu fa tausaga faatoa mafai ona faaoga. O lo o galulue pea si o matou itumalo aua le faatoaina o le laufanua ma toto le ava, e i ai se taimi ta feiloai foi i lou ofisa. E faafetai foi i le faamapue ma le faamatie mai, ole isi lea laau o lea ua lausiusi i tafaala o si ou itumalo, o le laau lea o le koko. Sa ou valaau i le ofisa i Nu'u ae faamalamalama mai vaega ma ogaaleeleo Samoa e ola ai le laau lea o le koko. Ona ou faapea lea, pe mea ea ua faapito ia le alofa o le koko na o isi itumalo, ae le ola i laueleele o Fagaloa. O le taimi lenei o la ua ola lausiusi i laueleele o si ou itumalo. O lea foi ua amata ona tua i ai isi foi o aiga, o lea ua lau mai i le taulaga nei ma faatau ai, o isi foi ua fai maketi i fafo. O lea e momoli atu ai le faafetai tele, aemaise foi o le tele o fautuaga ma luitau e momoli mai, o lea lava ua toe aoga i si o matou itumalo. Silafia foi o le tulaga lava lea i lou itumalo e tolu afioaga lau afioaga i le Fofoga Fetalai, o afioga ia o Sauano, Saletele ma Uafato, o afioaga ia o tulaga ia tau meataulima. O latou lava lea alamanuia o lo o faapena ona tautua ai e le gata i aiga, tulaga tau faalavelave o le lotu, aemaise foi o fanau i aoga. Afioaga lava ia e... ae faafetai i le Atua o lea ua toe tatala a tatou feoaiga i vaalele, lea ua tau maua ai se fesoasoani e maua ai avanoa e momoli ai ma lau ai i fafo ia tulaga tau mea taulima, la ua maua ai nai tupe faaopoopo, ae afai o le a se taimi e faataunuuna ai foi le faamoemoe o le Malo mo le maketi o le auina atu i fafo, o le fiafiaga tele foi lea i lou itumalo, aemaise lava nai afioaga ia e tolu.

Ona ou faasee mai lea i le Minisita o Galuega e pei lava ona ou faasoa atu, o le tele lava o pese, o le pese masani lava, e na ona fesuiiai lava. O afioaga ia o Sauano ma Saletele, o tulaga lava tau auala, o le tele lava o ao ma le po, e valaau mai lava. Ua silafia foi o le fale pizza lea o le Georgie's Pizza ua lauiloa, e faigofie ona tu le taavale i Apia, laalaa atu le toeaina ma le loomatua, Mauu e i ai se \$500 se i faatau ai se vaega o le taavale ua faaletonu. Ou fai atu, aisea? Ua faaletonu lava auala. Ou fai atu, ia ua lelei, o lea lava e tatalo pea. O lea lava e matauina o le auala lea i Sauano o le falesa Taiti, o le malumalu o le EFKS, e masalo e pei o le agai lea i luga o le falefono, e selau mita le mamao. O le tulaga la ua i ai, ua sau le vai ua le alu i le alavai e tatau ona alu ai, ae ua sau ua alavai mai luga o le aualatele. O lea la sa fesootai mai le faifeau, o lea sa ou tietie ai talaatu ananafi, ma matauina tulaga ia. Ia o fesuiiaiga lava o le tau, e leai foi se isi na te tete e i glauuga a le Silisiliese, ua uma foi ona faataoto alavai o autu ma mea uma faapena, ae a oo lava ina malosi le tetele o timuga ma tafeaga, ona matauina ai lea o le vaaiga lea.

E momoli lau faafetai tele i le afioga i le Minisita ma le Matagaluega. O le ala foi lea o lea sa ou luina ai lava le Matagaluega. O Fagaloa, e ese mai ai lava ia Samoa. E pau lava lea o le taimi lea sa ou fautuina ai lava le Minisita ma le Matagaluega, e tetele loa timuga ma tafeaga i Samoa aemaise lava lou itumalo, o le taimi lava lea e o atu loa le Matagaluega e

mataitu, mataitu uma vaega o alavai, leaga o isi taimi a faapea e agai atu i le taimi o mugala, e faigata ona latou silafia, ae o le taimi lelei lava lea. O lea la ua ou matamata atu i luga o upega tafailagai, o lea sa faasopolia uma e le Matagaluega. E momoli atu lava lau faafetai tele o lea ua outou silasila i ai i tulaga ia.

Ona ou faasee mai lea i Fagaloa tele, Fagaloa i uta, o afioga ia o Salimu ma Musumusu, lau afioga i le Minisita, o lea ua e silasila i ai ma le Matagaluega. O le upu moni lava, talu lava ona fausia e le Atua laueleele ma laufanua o Samoa, e le i oo ai lava se ta. O la e faafogafoga mai le paia o le falelua. O i latou foi nei o lo o tauvalaau mai, Mauu pau lava lea o le falelua, e pau foi lea o auala a Samoa, ua ou taamilo atoa i Savaii, e masalo e leai lava se afioaga e le i oo i ai se auala ta. O le falelua lea i si ou itumalo, o lea ua ou faailoa atu, e le i oo lava i ai se auala ta. Ua maea ona faatapena taligalu ma ua mautu, ae toe lava o sina ta e faata ai. Ae o e tele lava o si ou itumalo, faafetai i le Minisita i le va lea o Samamea ma le afioga i Lona, sa ou tuu atu lava i lea foi tausaga aepeitai o tiute faasoa lava, o lea ua au mai i lenei tausaga, o lea ua ou oo i ai ananafi, ma molimauina o lea ua faatino le galuega lea. E momoli atu ai le faafetai tele, leaga o le va lea, e folau mai ai le afioaga o Uafato, o si o matou nuu aemaise lava o le fegasoloai ai o le matou itumalo. O lea ua faatino le vaega lea, e momoli atua i le faafetai tele i lau afioga aemaise foi o le Matagaluega ona ua talia se talosaga foi sa tuuina atu, aemaise foi o lou oo atu i lo outou ofisa. E masalo o au le isi sui usufono ua tele ina faalavelave i lau afioga ma lo outou ofisa, ona o le naunau lava i taumafaiga o manaoaga o le itumalo.

O le afioaga lea o Uafato lau afioga, i masalo e lei oo i le Kirisimasi, sa fai lava si loloto o timuga, o lo o i ai lava le vai foi lele i le auala laupapa lea na e afio i ai ma le Matagaluega e asia. Ua ou tatalo atu i lau afioga, afai ua lava lau faasoa i lenei taimi, ai lava se manaia ae fausia loa le auala lea. O le auala lea lau afioga i le Fofoga Fetalai, a oo ina mamafa timuga, e matua le mafai lava ona sopo mai Apia. A o le itumalo foi lea e fai si mamao laititi, o lo o i ai nisi o vaega o le auala o lo o faapena ona lelei, a o le tele o nisi o vaega ua faapena ona faaleagaina.

E pei o le mea lea lau afioga i le Fofoga Fetalai, e pei o nai motugaafa ia a si ou nei itumalo. Ia faafogafoga mai si ou itumalo o le Vaa e tasi, afai e le o toe mamao foi Iuni i le paketi tele a lo tatou Malo, ae o le a taumafai atu lava sina vaega i lenei taimi, o lo o tau faasoasoa ae mo le lumanai...

FOFOGA FETALAI: Ia malie lau afioga i le sui usufono mamalu...

Susuga Hon Laauli Leuatea Polataivao Fosi: Faamolemole lau afioga i le Fofoga Fetalai, ona o lea o le a faaiuiu le saunoaga a le sui mamalu lea

na taua le tulaga o lana ava mua. E pau lava lea o le itumalo e ese mai lana fuafuaga ae le o fuafuaga uma lea e faataatitia e le tatou Malo.

O le aso ananafi na tatala aloaia ai faiga faavae a le Matagaluega mo le isi 5 tausaga. O se taimi ona faaoo uma mai lea o taiala na mo le tatou Maota mo le silafia ai o fuafuaga alualumamao a le tatou Matagaluega o Faatoaga ma Faigafaiva mo lenei foi vaitau, lea ua tupu ai faaletonu i le faamai, tau o le soifuaga, ia ma mea eseese lea ua tatou aafia ai.

O le tali la a le tatou Matagaluega ma le faigamalo, ia lava taumafa a le atunuu. O le mea lena e ala ai ona avatu le polokalame lea a tatou, amata muamua i talomua i itumalo taitasi, ia faasolo loa lea i le uluai seleselega.

O lea ua saunoa le sui usufono mamalu e ala i le avamua, o loo faatali le Matagaluega Mauu. O le taimi lava e te saunoa ai i le tatou aso e fai ai fai loa. O le aso a taeao o le a faatino ai le uluai seleselega a Anoamaa Nu 1 i le afioga o lo o faafoe e le Susuga ia Lufilufi. A i ai nisi o outou e avanoa taeao ia affio atu ma tala atu aao, o le faamoemoe lena o le tatou Malo e o atu uma ai Matagaluega e avatu tuualalo ma fautuaga, avatu meafaiagaluega, avatu ituaiga lautoto eseese, fualaaui aina, fualaaui taumafa mata, fualaaui faisua, o a uma mea e fesoasoani ua uma ona pasia e le tatou paketi \$10 afe, \$10 afe le mealofa a le tatou Malo i itumalo uma lava e faatotoga atu i suo, sapelu ma faila ma mea uma faapena. O isi itumalo e \$3 afe le tupe e avatu sao i le Taitaifono o le Komiti o fono faavae a le itumalo. O le mea la lena e le aia la i ai le Malo, o le mea lena e tau o le pule e avatu sao lava e fuafua lelei e le tofa, le Susuga ia Lufilufi le mea e tataui ona fai ae ua ou le taua tulaga lea Mauu. O le taimi lava e te saunoa mai ai o le a fai ai lau avamua, o lo o faatali le Matagaluega e avatu ai foi le tuualalo, paia e ma le mamalu o le tatou Maota, e uma le tatou paketi lea ia Iuni. O ai lava ua finagalo e faasolo lana uluai seleselega o lo o faatali le Matagaluega. A o le mea lava lea e tasi ina ia gafataulimaina i le taimi lenei, o le taimi lenei o le tatou limalima faatasi ia lava taumafa a le tatou atunuu.

O le faasilasilaga lea ma le faaaloalo lau afioga i le Fofoga Fetalai.

FOFOGA FETALAI: Se i tulai mai lau afioga i le Minisita o Galuega Tetele.

Tofa Hon Olo Fiti Afoa Vaai: Faafetai lava i lau Afioaga i le Fofoga Fetalai, lau afioga malie foi a le faalogologo i se saunoaga ua tuu lava se i maea ona avatu lea o se matou... i ina, ne i pea ane le afioga i le sui usufono ua le amanaia atu nisi o mataupu sa tulai mai ai, ona foi ua e silasila e leai se tupe faaagaga foi i lenei vaega mo a tatou galuega. A o lea ua faamaumau uma tulaga ia. E ono alu atu ai se asiasiga, ae aua e te popole o Fonoti lea e tulai atu. Ou te alofa ia oe leaga o oe o lau foemua o

lou sa, aua te popole o le a faasolo atu i ai la'u asiasiga i le vaiaso fou. Ma le faaaloalo.

FOFOGA FETALAI: Atonu o lea ua aoga foi le fesoasoani atu o le Minisita aua foi tapenaga a lou itumalo i lau avamua ae faauma mai le saunoaga ua maea lou taimi.

Tofa MAUU SIAOSI PUEPUEMAI: Lau afioga i le Fofoga o le Fono, atonu foi o lau susuga i le alii Aoa e i ai a lou agaga, sina 5 minute se i faauma atu ai nai vaega laiti ia o le lauga a Vaa e tasi se i ou pai muamua atu i le saunoaga a le susuga i le sui usufono po o le Minisita ia Olo.

FOFOGA FETALAI: Ua ou vaelupeina le saunoaga a le sui usufono. O le aso leni o le aso puupuu ua oo foi i le taimi o le tatou malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:31 i le taeao ma toe faaauau i le itula e 11.04 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Faamalo le onosai i le tatou maota, e iai le manatu ua maea paleauau le taligasua a le paia o le Palemene. Faafetai i le Atua i lana foai ua maua ai se faasiligamalosi e faaauau ai la tatou galuega. E matau atu lava i le tele o saunoaga a le tatou maota e agai i le Matagaluega o Faatoaga ma Faigafaiva. Mo le faasaoina o le tatou taimi aemaise foi o faamaumauga moomia e saga faamanino atili ia mataupu, o lena ua tufatufaina atu faamaumauga o fuafuaaga o le fuafuaaga o le vaega maoti o Faatoaga ma le Faigafaiva mo le taimi mo le vaitaimi 2022/2023 seia oo i le 2026/2027 e lagolago ai a tatou taulumaga o loo faagasolo.

E faataatiaese tatou taulumaga mo le malologa o le taeao o loo tau faamaea mai le saunoaga a le sui usufono mo le Vaa o Fonoti ou te tapa ma le faaaloalo le afioga ile sui mamalu tulai mai mo le faamaeaina o lau saunoaga.

Tofa MAUU SIAOSI PUEPUEMAI: Lau afioga i le Fofoga Fetalai, e muamua foi ona momoli atu le agaga o le faafetai tele tusa ai foi mo le taligasua sa saunia ma tapenaina e mamalu o lou ofisa. E talitonu ua maua se faasiligamalosi e le paia maualuga i le Palemene, e momoli atu ai le faafetai tele.

O le isi vaega lau Afioga a le Fofoga Fetalai, i le afioaga lava lea o Uafato. Mo le silafia e le maota ma le faafogafoga o le atunuu, o lo o iai se mataaga tele lava i le afioaga lea. O le afioaga foi lea, o le tele ia o tamaiti

o loo aooga i le Iunivesite o loo agai i le afioaga lea o Uafato ona o loo tele vavau o loo iai, aemaise ai o i tonu lea na maua ai le igoa o Samoa lea tatou te mitamita uma ai. Lau afioga i le Minisita o Galuega, o i tonu lava lea afua mai ai le igoa o Samoa lea e tiu ai i fafo Samoa, Samoa fea mea maua mai ai? Maua mai i le mataaga lea mea lea lau afioga i le Minisita o Galuega sei e silasila atu masalo e fou si vaega sia.

FOFOGA FETALAI: Malie le sui usufono mamalu o le Vaa o Fonoti sei tuu atu le avanoa ile sui mamalu.

Afioga Maulolo Tavita Amosa (Sagaga 2): E tulai atu ma le faaaloalo o lo o faafofoga mai Samoa, ma o le maota leni e avatu ai mea mamalu, le mau lea faaapea o Fagaloa na maua mai ai le igoa o Samoa. E teena e lo'u sui, ae a iai se avanoa e fia fofola le fala e avanoa ae mo le taimi nei e faamauina le teena o le sui o Sagaga 2 o le lafoga lea faamolemole.

FOFOGA FETALAI: Ia o auga lava o lauga e faapena lava, manatua foi o le atunuu e eseese talitonuga ae afai foi o le mau lea ua aumai e Fagaloa lea foi faafogafoga mai ia Sagaga 2, ia e faapena e lelei foi le talatalanoa i mau moni, a o le avanoa lea faauma ai le saunoga lau afioga i le sui mamalu.

Tofa MAUU SIAOSI PUEPUEMAI: Faafetai i lau Afioga i le Fofoga Fetalai, famalulu atu foi i lou uso a sui usufono. Lea ua saunoa le afioga le fofoga fetalai, e tala eseese lava le atunuu, Lagituaiva lava e le tau fesiligia lea vaega lau afioga i le Fofoga Fetalai e tauala atu ai se manaoga lau afioga i le Minisita o Galuega. O lo o matauina pea tele lava o suesuega a alo foi ma fanau o le atunuu o loo aoaoina i le Papaigalagala e agai i lo'u itumalo. O le ala foi lea o lea ou te avatua ai mau mautinoa i lau afioga ona o lea e i ai pine faamau. E ia i le pasi na avatu ai le aoga a o le upu moni a, faafetai i le Atua na sau la le pasi avatu lo'u tausoga e avea le pasi i luga, ua alu atu ua le mafai ona a'e i luga ua faaletonu le auala, ae fesili atu ai lea i le mafuaaga o le faigamalaga? Ae o le molimau lea sa momoli mai e faiaoga e fia fai au suesuega i le afioaga ma le mataaga lea o Uafato o le ala lea lau afioga ile Minisita faaopopo atu si vaega laititi ona e taua tele le mataaga lea aemaise o suesuega a alo ma fanau.

Ia o le matou taligalu o le pese lava lea ae ou te talitonu o le atoaga o lena ua taoto atu i lau afioga ma le Matagluega amata atu lava i Taelefaga, Masina, Lona ma Samamea faapea foi le afioaga i Uafato o loo faapena lava ona afaina pea si o matou itumalo. Ae talitonu o loo iina le uta a le fai mea lelei. Ona ou oo mai lea i le Minisita o vaalele o le a ou le talanoa ile vaalele lapoa, ae o le a ou talanoa i le vaalele lea lele i Tutuila ou te alu atu i luga o le Geogies Pizza o la e alu i le atoa le tausami a se tasi o loomatua. Ou fai atu Tina aua le faanatinatia e vevela tei ua afaina lou soifua ae

faimai le tala a si loomatua, Mauu o a'u lea faatoa taunuu mai le vaalele sa ou malaga mai Tutuila faapea le vaalele e alu faapenei e oo mai a o uu a lo'u fatu laititi le vaalele ae pei sa ou matauina leaga sa ou faalua ona malaga i Tutuila i le tatou vaalele feololo lea ta'u o le... pe 35 ile 37 le pasese o le toatele o lo'u itumalo e talitonu e faapena le atunuu aemaise lava nai tina matutua ma tama matutua. Ia o tatou lea ua masani ile folau foi i motu tuaoi a oo nei ina tau malua le vaa i luga o le ea tulou le faafofoga, ia e faapena e faalogo mai a le ave vaalele o saunoa atu, se se faamolemole o lo ta fatu lenei tulou le agaga se i silasila ane lau afioga ile Minisita ma le Matagaluega, si na tatou vaa feololo lena ioe aua e mafai foi e le vaa lena ona ave ia malaga ia e lua malaga ia lua, o tamai vaa laiti ia o le Twin Ott. E mafai ona ave uma ile vaa lea e tasi ia nao na lafo atu ae faatupu manatu foi se lagona o lenei itumalo aua foi le fegasoloai, aua lea ua matauina le tele o le mamalu o le tatou atunuu o loo gasolo i le motu tuaoi i sasae ia faapena foi sasae e agai mai ile tatou motu nei, Lau afioga i le Fofoga Fetalai...

FOFOGA FETALAI: Ia sei saunoa mai lau afioga ile Minisita o Galuega tetele.

Tofa OLO FITI AFOA VAAI(Salega 2): O a'u faatoa ou vaai lea i se vaalele e alu faapea i le faiga lea o le aao o le sui usufono, aua e leai a se vaalele e alu faapea pei e taamilomilo foi. E i ai a lo'u masalosologa, masalo poo se mea faaletonu i pizza lea na faanivaniva ai le loomatua ma le faaaloalo.

FOFOGA FETALAI : Ia toe tasi le minute o le sui.

Tofa MAUU SIAOSI PUEPUEMAI: Faaiu mai lea i le masiofo, si ou tuafafine Minisita o Tupe. E pei foi ona ou talanoa atu ia la ta itumalo foi sa ta iai faamauina le lagoalgoina foi e lenei itumalo o le faamoemoe e pei ona folasia. Ia o upu lava e masani ai ma le tuualalo a lenei itumalo, maua pea le onosai. Talitonu ua loa foi lau Afioga i lufilufiga foi o nei mea o seleni aua le tau atinaeina ma le faasoasoaina o le tele o manaoga o le tatou atunuu i lea itumalo ma lea itumalo. Faaiu ai lea o so matou vaivaiga lau afioga i le Fofoga fetalai, alofagia le faatafetafea ai o le afioga i le taitai o le atunuu, afioga Palemia aemaise foi o afioga i alii Minisita o toesea ai foi i tulaga pei ona silafia. Faamanuia foi le Atua i le Sui Palemia aemaise foi o le aiga Minsita feagai foi ma le tau amataina o galuega i lenei tausaga. Ia i ai le agalelei o le Atua, maua lo outou soifua laulelei i le tino, maua foi lo outou onosai ma lo outou faapalepale aua le faatautaia o tonu fai, aemaise lava Matagaluega e pei ona tautua ma auauna ai. Ia faapea foi Afioga i sui Minisita, Afioga i le Sui Fofoga Fetalai, afioga foi i le Sui

Taitai o le Itu Agai, ma sui mamalu uma. Maua lo outou soifua laulelei aua la tatou folauga lea foi ua tay amata, faafeiloai foi ma faamanuia atu i Ofisa Sili o Pulega o le tatou malo aemaise Ofisa Sili fou le afioga ia Aeau faapea foi le afioga ia Aiono. O lea foi ua tatou feiloai, faamanuia atu lenei itumalo. O a foi tiute ma faiva aemaise o le valaauina, sagai ane ai o le tai, tautuana lau afioga Aiono faapea foi lau afioga Aeau, o aoga a lo'u itumalo o Fagaloa aoga a le itumalo, o sa matou tala lea, manuia lau afioga i le fofoga fetalai malo le onosai malo le faapalepale foai le Atua lou malosi. Ia faateleina pea ou tamaoauga ma le sosia e le gata ile tino ae faasili la le agaga ae ola le sui o Fagaloa, manuia le tatou fonu.

FOFOGA FETALAI: Malo foi faasoa lau afioga ile sui mamalu mai Fagaloa mai Vaa o Fonoti, talitonu ua faamau lelei i lalo e le tatou faigamalo ia nisi fuafuaaga mo le tatou itumalo, ia malo faafetai. Ua maea lea itu o le maota, o loo totoe pea avanoa ona e tuu foi le avanoa i le Sui Taitai o le itu agai ona faatoa oo ai lea i le Taitaifono, o le faasologa lena o le tatou galuega o loo totoe i le taimi, pe iai se tasi o totoe i lea itu? Oi faamalulu atu i le tama matua ia Tea ua le maua atu le moli, faafetai malo lava. O le measili o lena e maualuga pea le aoina o le masina ia te oe le tama matua. Se i tulai mai Faasaleleaga Nu 4, le tama matua ia Tea Peato.

Afioga TEA TOOALA PEATO (Faasaleleaga 4): Faafetai tele i lau Afioga i le Fofoga Fetalai mo le avanoa ua afea mai ai si toeaina nei. Ua ou manatu lava e sili ona faauma atu ia e a'u lenei aso, aua o lea ua ou tilotilo atu ua vave le taimi. Lau afioga i le Fofoga Fetalai sa ou manatu lava ou te le lauga ona e matua lagolagoina e lenei itumalo le Tala o le Tupe. Ona ou manatu lea sili a ona ou malolo ma ou nofonofu aua e leai se aoga e tau lauga a o lea ua ou nofo a ma matua lagolago. Peitai ua ou toe mafaufau ane lava, e le aoga foi ona ou nofonofu ma lagolagoina le Tala Faaopoopo o le Tupe ae leai sa'u faafetai. E momoli le agaga o le faafetai ae ona ou malaga ai lea i Savaii ia ma ou malolo ai foi i lea vaiaso ma lea vaiaso. Ae ou te lei tuua Savaii ou te malaga mai i le fonotaga lenei. Sa fai la matou fonu a le matou itumalo, sa ou faamavae atu i le matou Komiti o le Fono Faavae, ia outou tapuai atu o le a ou malaga ou te alu leaga o le fonu a le Palemene. Ae fai mai se aua te alu fua nofonofu tatou, sole se leaga nei tei ua faapea mai ua ou amanaia lo'u tofi. Fai mai ia sau ia ina alu, o ou mama na, tusa lava pe e te le lauga matou te talitonu lava, seiloga lava e te maliu faatoa uma le tatou tofi ma oe. Ioe, po o lea le uma o loo soifua matou te lafoai atu lava le tofi o le tatou itumalo ia oe, se ese le lelei o lenei itumalo. Lau afioga le fofoga fetalai se malie ia ua oso foi lo'u sela, o le isi itu e tau le mafai ai ona ou tulai soo ou te lauga, fai mai si a'u fanau se Papa o oe e

te maselasela ia, se aua e te toe lauga ma lou sela. Ae ui i lea, a o faafofoga mai si au fanau, o lea la o le a ou taumafai e aua ne i ou toe sela.

O le agaga faafetai e molimoli atu lau afioga e pei lava ona ou taua, e le aoga ona ou nofonofa ma ou lagolago i le Tala o le Tupe, ae ao ona avatu sau faafetai. Faafetai tele lava. E amata mai lau faafetai i lau Afioga i le Fofoga Fetalai, faafetai i lou taitaiga o le tatou Fono, ua matauina pea lou lavapapale. Se na ou fiafia lava i lau saunoaga i le taeao, se o le fatu lenei o le matua fatu lava, lau saunoaga i lou fatu o lena e malosi. Ia faafetai lava, faamalo lava lau Afioga. Faafetai mo le taitaiga o le tatou fonotaga, le fono a le atunuu. Faamalo faafetai.

Ia ona oo mai ai lea o lau faafetai i le Afioga i le Tamaitai Palemia, e ui lava ina ua toesea ona o fuafuaga pei ona silafia i le feagai ai ma gasegase o le tino, ae tatou te tuu pea i le Atua. Ae momoli lau faafetai ona o le faafoeina o le tatou Malo. Faamalo faafetai.

Faamalo i le Sui Palemia ma le Aiga Minisita. E ese le manaia, e ese lou fiafia i le tauaveina ma le tulai mai o le faigamalo. E ui lava ina tele le fesouaiga pei ona i ai, ae faamoemoe i le alofa o le Atua, o lenei lava ua alu lava le tatou faigamalo, ma e faamoemoe lava i le Atua. O lou lava lea talitonuga, a tatou faamoemoe lava i le Atua, e leai lava se mea e... faafetai faamalo.

I le taimi nei la i le toesea o le Afioga i le Palemia, a o lea e tulai mai le Sui Palemia. E pei lava ona ou fai atu lau Afioga e, o le faafetai le mea lea o le a ou fuli e fai, ma ou te manatu e uma lava le taimi lenei o alu lau faafetai. Ou te faafetai auiliili atu lava, e le gata i le Malo ae faapena foi i le la Itu. E tele saunoaga matagofie.

Ia, ae faasolo pea lau faafetai, aua tou te faalavelave mai i lau faafetai. Ou te faafetai atu i lau Afioga i le Sui Palemia, aua ou te talitonu lava, o lou lava lea talitonuga na o au, o lo o e tulai mai e faafoe... e pei o vaega tonu lava ia o le tamaoaiga o le tatou atunuu ua e tulai mai ai o lo o maua ai nai seleni e faamoemoe i ai le atinae o le tatou atunuu. O lea ua e tulai tonu mai ai lava. Ae i lou lava sui usufono, sa ou manatu lava, e tele le faaletonu o le aoina o le tatou tamaoaiga mai tupe maua sa i ai. Ae ou te talitonu lava i lau maitau, ua amata ona lelei ona aoina mai nai seleni na. O tatou lafoga, o GST, ou te talitonu lava na o au lava, ou te le faapea... e i ai seleni e le i lelei ona ao ma o lo o faapena. Ou te faafetai atu ona o lou lava talitonuga i le vaitaimi lenei i lau matau atu, o lea ua amata ona... ou te faafetai o lo o lelei ona aoao mai nai a tatou seleni nei. E faafetai atu ai la i lau Afioga aemaise foi o le Matagaluega i le latou galuega o lo o faafeagai ai i le tau... aua o i lava e maua ai le tatou tamaoaiga. A lelei ona putiputi mai ma aoao mai, ou te talitonu lava lau Afioga i le Fofoga Fetalai, o le a faapea ona manuia le tatou Malo i le agai atu i luma. Ia, o lea e momoli atu ai le agaga faafetai tele lava i lau Afioga. Ou te talitonu foi lava i le tele o au saunoaga ia o lo o aumai, o lo o feoloolo lava le tau ao maiga o tatou seleni.

Ia e faasolo lava lau faafetai, faamolemole lava le paia o le tatou... e uma i oso atu i o i le Itu le la. Faafetai lava i saunoaga a le la foi Itu, e ese le manaia i lau faalogologo, se e faaoso fiafia. Faamalo faafetai i le Sui Taitaifono, oi le Sui Taitai o lena Itu. Faamalo. Ia e faapena lava le tatou soifuaga nei, e avatu aumai. Ae i ai lava saunoaga e ese lou fia faalogologo i ai.

O le tatou atinae lenei po o le tatou \$1 miliona tala lenei tatou te vavao ai pea lava ma feaveai a tatou faamatalaga, fai mai se isi vaega e leai e le fetau, e le taunuu, ae ese lou fia faalogo foi i nisi o sui o le la Itu o saunoa mai ma aumai le latou lagolago. O le sui usufono o Vaimauga 2 na ou faalogologo lava i ai i le manaia o lana saunoaga, ua talia ma le fiafia. Ia, o Sagaga 2, o la e faafogafoga mai, e ese lou fiafia. E ala ona ou fai atu, ou te fiafia e faalogologo foi lele o aumai le latou foi lagolago, e pei e faaosofia ai foi o matou lagona, o matou ia e i le Itu lenei na amatamea i le poloketi lava lenei, le \$1miliona. O le tele ia o faaupuga i lenei poloketi, ioe. Ae ou te tau atu i lou itumalo, e ese le manaia o le matou taumafai lau Afioa i le Fofoga Fetalai. E ese le matou fiafia e tau... O le matou itumalo, e i ai foi sui o le HRPP, e i ai foi tagata e lagolagoina le HRPP, e faapena foi i le Itu lenei a le FAST po o le Itu e Puipuia Aia Tatau a Tagata. Oi, leai, o le HRPP lena ua ou toe oso atu foi i ai. Ia, le Itu lenei a le matou Vaega. Ae ese le matou itumalo, aua o le tama lenei o A'u e Taitaifono, se e ese lou fiafia i saunoaga, ua leai se faapea e faasinoina foi lele... ua tasi lava matou. O matou ua le toe i ai se... Se o au na o le sifi lava, o le tama lenei o A'u na o le nofonofa lava ae fai mai a latou saunoaga ma... e ese lou fiafia. A fai se matou talanoaga, ia, e pei lava na o lou faamaepaepa lava ae fetufaai le tofa ma le faautaga. E manaia i lau faalogologo, a o le sini autu o lau faalogologo, o le lagolago mai ma taupati mai.

Ma ou te talitonu lava au na o au, tatou o e opogi lenei... se ou te talitonu lava e manuia tatou pe a tatou... aua foi o lea ua avatu lava le seleni lenei i o tatou itumalo, e le o toe posi atuga i inei, o la e ua posi lava e le itumalo ia, talanoa ma taumafai e atiae le itumalo. Tusa o la e ua avatu lava le seleni, o le ala lena o lou fai atu, se ou te faafetai lava i sui usufono nei e saunoa mai ma latou lagolagoina lenei taumafaiga. Ioe. Ou te talitonu lava, a tatou galulue ma le faamaoni, o lea ua oo mai lava seleni i o tatou lima, i o outou aao ma o tatou lima. E maua ni seleni i totonu o le tatou itumalo? Matou talanoa lava, e ese lou fiafia i le matou itumalo, ae talosia ia faapena uma itumalo. E pei ona ou talanoa atu e i ai itumalo ia o latou taitai po o latou tofi o HRPP, ae aumai saunoaga, e ese lou fiafia i ai. E pei e faatupu fiafia ia te au, ona o lou naunauga lea e i ai, i lou lava sui usufono toaina, se ia manuia le taumafaiga lenei. E le o se taumafaiga e manuia ai na o se vaega. I lou lava lea talitonuga. Aua o le seleni lea ua alu atu i o outou aao ma aumai i o matou lima tatou te posiposiina, posiposiina lelei. A lelei ona

tatou posiposi, e manuia ai lava lo tatou itumalo. Ia, o lau faafetai atu lea i lea vaega.

Se e pei lava ona ou fai atu, onosai mai, e tele lava lau faafetai, e le i taitai uma. E uma lava le tatou aso lenei o ou faafetai. Ia, e faamulimuli lava lau faafetai i le Minisita o Falemai, le Minisita aulelei. Onosai mai, se i mulimuli atu lava lau faafetai i lau Afioga.

Faafetai i le Minisita o Tupe i le tau faasoasoina o lenei seleni, aua a maua mai seleni mai o i le aoaoina mai o seleni, ona avatu lea i aao o le Minisita o Tupe ma lana Matagaluega e faasoasoa lelei. Aua o lau lauga muamua lava lena, ia outou faasoa limalelei, aua ne i faapito manu ia Tasi, a ia faasoasoa lelei lava. Ia, a ua ou maua i lenei Tala o le Tupe e ui lava ina utiuti, ae o lo o faasoasoa lelei lava. Faafetai. Faafetai i lau taumafaiga lau Afioga i le Minisita o Tupe. A lelei ona faasoa limalelei le tamaoauga o si o tatou atunuu, e uma le tatou fevaai ae tatou fiafia faatasi.

O le isi Minisita o le Itu lela e ese lou... o le Minisita lea, le sui usufono mo Satupaitea, lau tama lea o Lautafi. Se malie ua tau atu faapena lou suafa. O lou fiafia ia i au saunoaga. E ui lava ina lua fetauai soo ma Olo, se ae manaia foi i le faalogologo. E pei lava e malie i isi taimi, ae faafetai. O ituaiga saunoaga lava na e manaia tatou te fetufaai ai.

Ia ma le tele o outou na e oo ia Sagaga 1 lena e te lua sosoo ae, e ese lou fiafia i ana saunoaga. E i ai lava isi taimi e pei e tutui ai ana saunoaga, ae faasaosao atu lava e le Minisita o Falemai a outou saunoaga faauigalua, ioe. Ia na ona ou fai atu lava i le Afioga i le Minisita, e malo lava lou tulai atu e faafetai tama la. Ioe. Ia, o lou naunauga lava faa-sui usufono...

FOFOGA FETALAI: Ia malie ia oe le tama matua le sui usufono Tea, se i tuu atu le avanoa i le sui usufono mo Sagaga 1.

Afioga Hon Loau Solamalemalo Keneti Sio: Lau Afioga i le Fofoga Fetalai, o le mea aupito sili ona taua i lau faalogologo atu foi i le lauga a le toeaia le toe ulutaia foi o le Maota, ia faafetai Tea, ioe. O le agaga... se e aumai lava le uli e toa ai le moa, e talanoa mai foi toeaia o toeaia lava o le Palemene. O le mea sili ua ou iloa, o i la lea sa faasoosoa nei le Minisita i le tulai soo o le Minisita o le Soifua Maloloina i le tele o ana faauilavea, ae leai la o la e sau mai tua ia Tea le faasoosoga. E ui i lea, faafetai Tea mo le saunoaga matagofie.

FOFOGA FETALAI: Malo faafetai. Ia, faaauau mai le saunoaga. Oi, mo le faasoina o lou taimi Faasaleleaga 4, ia se i tuu atu le avanoa i le Minisita mo le Soifua Maloloina.

Afioga Valasi Luapitofanua Toogamaga Tafito Selesele: sSe i to lelei le sela o le sui usufono, ae faafetai. Na o le mea e fia faamanino lau Afioga

i le Fofoga Fetalai. E ui lava ina ma galulue ma Tea, ae seasea ma talanoa, faatoa ma talanoa mai lava iinei. Ae faamalulu atu i le sui usufono mo Sagaga 1, e leai ma se ma fetuunaiga, e le faaosoa foi le sui usufono o Vaisigano e le sui usufono mo Faasaleleaga 4. Ia, a o le Maota lenei, o le Maota o le polokiki, o le avatu aumai, ae faafetai Tea, aua e te toe faamimita au, ae alo i lau lauga ia manuia, ia saga lauga i mea uma.

FOFOGA FETALAI: Ia faaaau mai le saunoaga a lau afioga i le sui usufono mamalu le tama matua, Faasaleleaga 4.

Afioga TEA TOOALA PEATO: Faafetai tele lava. Malo lava. E pei lava ona ou talanoa muamua i lau lauga, o au ou te le iloa lauga ae ou te iloa talanoa. Ia outou malilie la o lea ou te talanoa faafetai atu ia i latou uma lava o lea ou te faamaumauina lou agaga faafetai. Faafetai i le Minisita o... O lea o le a toe oo mai foi i i, le Minisita o Faatoaga. E tele taumafaiga o atinae mo le tatou tamaoiga. E pei lava ona maitauina le tele o fuafuaga o lo o taumafai, aemaise lava le naunautaiga ina ia maua le taumafa a le tatou atunuu e aunoa ma le tatou faalagolago i fafo. O lea lava ou te nofonofu ma ou fiafia, o lea e i ai le taumafaiga lea e le gata i... a o le taumafai e fausia lava taumafa mo totonu o le tatou atunuu e pei o fuamoia ua i ai i totonu o si o tatou atunuu e aunoa ma le toe aumai mai fafo. Ia, o le taumafaiga foi e faia ia tulaga o meaai foi lea, ina ia maua i Samoa nei fuafuaga ma le toe tau auina mai fafo o tatou taumafa. Aua tasi lava lea vaega tele o le tatou tupe alu o le tau aumaiga o tatou oloa mai fafo, a o tatou e le lava se tatou foreign reserve, e leai... te'i lava ua ou tautala i ia upu ou te le iloa nanu. E le lava se tatou tupe faaagaaga i fafo, aua foi e leai ni tatou oloa o ave i fafo. A o le tupe lea tatou te faamoemoe nei i ai maua ai tatou... o tupe auina mai o tatou tagata mai fafo. E tasi lea faafetai o lea e taumafai e avatu o tatou tagata i fafo. Atonu o lea o le a tau sau lou sela, se i tulou lau Afioga i le Fofoga Fetalai. Ae faaalu pea lau faafetai.

Faamalo i lau Afioga i le Minisita o Tupe. Se o le faalavelave e tau galo lava ia te au tou portfolio sole. O Galuega Tetele, le tama lea o Olo. Se o le tagata sole o le matua lelei lava o le tagata, le tagata lea o Olo. E masani ona lau mai e Olo au o le faiava i le latou aiga. E sao, a o le leaga ia ou te fiu e tauamo ni mea a lou itumalo o le faigata ia. Ae ui i lea, Olo, se i e alofa mai i le faiava a le tou aiga ia e fesoasoani mai i mea ia e tagi atu ai, o auala o si o matou itumalo. Se o le tele ia o... E te silafia foi Olo, vaeane lava lau Afioga i le Fofoga Fetalai, o nei mea o auala, e le uma, e fai nei, e le umi ae toe leaga foi, toe tagi atu foi. O lea ua aumai le fesoasoani a le \$1miliona, e i ai la nai tamai auala ia e faapea mai, fai i tupe na e outou. Ia o lea ua matou taumafai e fai ai nai auala foi ia laiti. A o alatetele la ia i le alu agai i uta i faatoaga, lea matou te talosaga atu ai. E i ai matou nuu sa fai

muamua auala, nuu o le itumalo lenei, ua toe leaga uma. Ia ua uma ona matou talosaga atu.

O le isi itu faamolemole, o le sui usufono toaina lenei, vaeane lava le afio o sui usufono mamalu o le Fono, e le iloa tusitusi, ae fai mai, aumai le tusi, aumai le tusi. Se faamolemole ou te le iloa tusitusi. Ae avatu ia i luma nei, i luma o le afio o le Fofoga Fetalai ma le paia o le tatou Palemene, o nai manaoga na faamolemole.

O le Minisita o le Siosiomaga, ou te le iloa po o ai la e Minisita o le Siosiomaga...

FOFOGA FETALAI: O Toeolesulusulu lau Afioga i le sui usufono.

Afioga TEA TOOALA PEATO: Se i alofagia si o matou itumalo ua leai ni fanua e galulue ai. Se ua le iloa pe na faapefea ona aveese se eleele o matou i uta, ua te i lava ua fai mai o la e ua pule e isi, o la e ua nonofo ai isi tagata ma latou faataua eleele ia. A o le talosaga, malie lou finagalo, e faapea foi le Minisita o Faatoaga, na ou faalogo atu lava o saunoa i ai le Fofoga Fetalai, ia alofa mai i eleele o lona itumalo. A o au, e tuaoi lelei lava ma le Fofoga Fetalai, i te'i ua muamua foi le Fofoga Fetalai ave i ai se... ae mala ai matou.

O lea la faamolemole a outou Afioga i Minisita, tuu atu faalautele ia i a outou Afioga uma lava i Minisita, ia outou alofagia lenei itumalo ua leai ni eleele. Ioe. Ua le iloa pe na faapefea ona aveese o matou eleele. Se faamolemole lava lau Afioga ua leva ona ou talanoa atu, ou te le i tusi atu ae na ou alu atu lava i lou ofisa. Leaga foi na ou alu atu lava, e ala ona ou alu atu ou te le iloa tusitusi. Na ou talosaga atu lava lea i lou ofisa. Ua ou fefe lava e toe alu atu. Ou te le i toe oo lava i se Minisita. Ua ou fefe e alu atu ae fai mai, soia tou te omai soo, ua tiga mata ia outou. Ia o lona ua ou le toe oo atu ai lava, ou te le o toe oo lava au i se ofisa o se Minisita, ou te fefe. Na o lau Minisita lava o le Falemai ou te oo i ai. E ala ona ou alu i ai, o le talosagaina o mai o le matou aiga. Ioe. A o nisi Minisita, ua ou fefe, ua ou fefe. A o lea o le a avatu i lumamea nei.

Ia, ia outou alolofa mai i le matou talosaga atu. E pei lava ona ou fai atu, e le uma au faafetai. E faamulimuli lava lau faafetai i lau Minisita, e ese le lelei o lenei Minisita, o Minisita uma lava, e ia i le Minisita o Aoga. Faafetai ua i ai lau CEO, ioe. Ua i ai lau Faatonusili. Ioe. E fesoasoani i le taumafaiga a le... O le isi lea... E pei lava ona tatou molimauina, o le isi lava lea Matagaluega pei foi ona saunoa le sa avea foi ma tofi Minisita o Aoga, o la e afio mai Loau, e ese le taua o lenei Matagaluega i alo ma fanau. Sa saunoa foi le tamaitai sui usufono mai... O fea foi lava le itumalo, oi se ua galo foi ia te au le tou itumalo, le tou itumalo ma le Minisita...

FOFOGA FETALAI: O Alataua Sisifo.

Afioga TEA TOOALA PEATO: Le Alataua Sisifo. Se i tautuana se le taumafaiga o alo ma fanau a si o tatou atunuu. A atamamai a tatou alo ma fanau, ia, o le a manuia le tatou atunuu i le agai i luma. E moni lava lau tala. Faafetai o lea ua i ai lau CEO fou. Se o le tama foi e laitiiti le tama. Ioe, ua leva ona matou faatasi na soifua mai le tama lea ma ou ola, e masani lelei maua ma Aeau. Ia manuia le taumafaiga a le tatou Matagaluega o Aoga i le agai atu i luma aua se manuia o le tatou...

Ua tau galo ia te au le isi Minisita se. Le Minisita o Faamasinoga. Oi sao, tasi lea tamaitai lelei o le Minisita o Faamasinoga. E ese le tele o faafitauli e feagai ma lau Afioga, ae faamoemoe lava i le tofa i lau Afioga. Ioe. E tele luitau e feagai ma oe, aemaise na tatou fevesiai ai, e oo mai lava i le taimi lenei o lea tatou te fevesiai ai. Tatou faamoemoe i le Alii e fesoasoani mai, ae ia maua lau tofa, ia e taumafai i le mea lelei ma le mea sili ona lelei aua le faafoeina o lea foi vaega. E tele faamasinoga ua faale... e oo foi ia te au o la e faaletonu foi au faamasinoga i nei mea, e te'i lava ua sau ua ifi au ua leai se suli. Ou faapea, ae, sole, a le suli faapefea le toeaina o lea e alu i le Palemene ae fai mai e le o se suli? Ua tou tagai i ai i faigamea nei a le faamasinoga? Ia e lafo atu, lafo atu i ina se i toe fai ane pe a, pe suli le toeaina lenei o au.

Lau Afioga i le Fofoga Fetalai, ou te lagona lava le agaga faafetai. E pei lava ona ou fai atu, o lea tatou te faatasi iinei ma le aufaigaluega mamalu a le Malo. E i ai lava lou talitonuga, a le lelei ona tulai mai le aufaigaluega a le Malo e lagolago le tatou pitolaau, o tatou o suli po o sui o le atunuu o lo o lipoiina upu o le Malo o le atunuu, a le lelei le latou faasoa mai, ma le latou lagolago mai, e oti tatou. E moni lava. Tatou te faamoemoe i le galuega a le aufaigaluega a le Malo. A le lelei, a feloulouai loa e feeseeseai o latou finagalo, matou te lagolago i le itu lea, matou te lagolago i le vaega lea... Ae a tulai mai lava o ai lava le vaega e tulai mai, o tatou lena, tatou alu uma i ai, matua galulue faatasi ona talitonu lea, e aunoa ma se toe faaletonu o le atunuu lenei. E moni lava. E tasi lea mea o lea e faaletonu ai, feeseeseai finagalo, fai mai isi, e sili lava le Malo lea na uma atu nei. E ifi le vaega lea ua omai nei, matou te le manana oi le vaega lea ua omai nei. Faamolemole, o ai lava ua tulai mai, o ai lava ua tofia mai, tatou galulue faatasi. Ia, o lau tatalo atu lea, tatou galulue faatasi.

Silasila i la atunuu, Fiti lale, na ona uma lava fai mai Banimarama, o outou na, ua uma au, uma loa. E leai ma se mea o toe pisa. O lea ua faamavae Jacinta le Palemia o Niu Sila, ioe. Se, e fesui lava faapena pulega o Malo, so o se Malo lava, e le mafai ona tumau. Po o ai lava le Malo e fai mai o le matua lelei o le Palemia lea. Se leai, e alu alu lava fai mai, se ua leaga le Palemia, sui, sui. A sui loa, o outou e faamoemoe atu i ai, o lo outou paia ma lo outou mamalu. A sui loa, sui atu ai ma outou. Tatou o uma lava, ioe. Ia, o le tatou... se ua ala ona ou... se i tau faaoo

lava i le taimi e manava ai le tatou galuega, ona ou le toe sau ai loa lea i le vaiaso lea. Aua a le uma lau lauga nei...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, i lou tulaga faa-Minisita...

FOFOGA FETALAI: Malie le sui usufono mamalu, le tama matua, se i tuu atu le avanoa i le Minisita o le Soifua Maloloina.

Afioga Valasi Luapitofanua Toogamaga Tafito Selesele: I lou tulaga faa-Minisita o le Soifua Maloloina, ua tau popole i le soifua o le sui usufono. E tatau ona faatu se lafo e faagata loa le... so o se maea lava po o so o se fusuaga afai ua sela ma faaletonu, ia e faalava loa le fomai.

O lou popolega la o le Minisita o le Soifua Maloloina, ne i te i ua ou toe tigaina, ae pei o le mea lena. E fautua atu o lea ua sela lava si au uo, ae tatau ona faauma mai.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa.

FOFOGA FETALAI: Mo le faasaoina o le taimi, saunoa mai le sui usufono mo Vaimauga 1.

Afioga Sulamanaia Fetaiai Tauilili Tuivasa: Ioe. Ou te masalo o se faamanuiaga i lenei sui usufono, ua maua le avanoa e malele ai ma sausaunoa le tama matua, o le tele o taimi ou te tuualalo i ai, o afea ea e te lauga ai. O se faamanuiaga lena i lou sui usufono, pe te ta talanoa pet e... ae ua lava a lena mo lou nei sui usufono. A o lenei itula ou te tulai atu ai ma lou agaga faaaloalo, o le manaia ia, e pei lava o upu a le atunuu a manaia lava se pese ta te fia siva lava.

A o le popolega lea ua i ai nei lou sui usufono, ona e pei foi ona saunoa Loau, o tua e aumai ai fautuaga. O le upu lea fai mai a tulai loa o ai lava le faigamalo faamavae loa latou. O lea la ua maua, pei o i lea e fautuaina le faigamalo i le tele o nai CEO lea ua le toe omai foi lea, pei o lea ua alu lea i le system a Amerika foi lea. Ae malo malele, malo sausaunoa i lau Afioga i le tama matua. Ia e pei ona ou fai atu, o se faamanuiaga i lenei sui usufono ma lenei itumalo pe a e malele. E leai lava se mea pe uma nei pe alu, ae fia faalogologo pea le sui usufono o le Vaimauga.

Lau Afioga i le Fofoga Fetalai, ia manuia toega o le Fono.

FOFOGA FETALAI: Malo faafetai. Ia, e i ai foi le manatu e le aumaua foi avanoa faapenei aemaise foi o le aumatutua o le Maota, e faasoa mai foi, e maua foi le isi faasiligamalosi i le paia o le Palemene, aemaise foi o le

faafogafoga mai a le aufaigaluega aemaise foi o le atunuu. O le mea lea, e talitonu o la e lava le malosi o le tama matua, faaauau mai le saunoaga.

Afioga TEA TOOALA PEATO: Lau Afioga i le Fofoga Fetalai faapea foi si ou uso o Vaimauga... O fea foi le tatou itumalo? Se e galo lava ia te au le tatou itumalo.

FOFOGA FETALAI: O Vaimauga 1.

Afioga TEA TOOALA PEATO: O Vaimauga 1. Faafetai. Ou te le i fai atu a sui loa le faigamalo faamavae ma le aufaigaluega. Leai. E lagolago mai loa i le isi faigamalo lea o le a omai. Ia, o le uiga lena o lau taumafai atu, ia tatou galulue faatasi.

Ona o lea ua saunoa le Minisita o le Falemai, o le Minisita aulelei lava le Minisita lea, ua fai mai ua alofa mai ia au ua tatau ona togi le solo a au ua... fai mai so o se taaloga lava, e oo loa i le sela o le tagata togi le solo. O lona uiga ua lava. Ae malie lou finagalo e le i oo atu lau faafetai i lau Afioga, ae o lea ua e fai mai e togi lau solo, a o lea e faasolosolo atu lau faafetai. E ese lou fiafia e fai lenei mea o le faafetai. Aua foi na ou ola mai lava o fai le mea lenei o le tautua, ou te tautua lava au. Sole o lou itumalo, o au lava na ala ai ona ou le sau. Ua alu alu ou musu foi i lenei mea o le polokiki i isi taimi, ta te le fia sau, aua foi o lenei mea o le polokiki, se e moni lava le sau a le isi oi ae matua faasese atu lava e le isi matua sese lava. O le matua sese lava. Ia vaai i lenei taeao, e manaia manaia lava le saunoaga a le isi oso atu loa le isi fai, ona te i lava lea ua toso ese ma le mea lea.

O le matou itumalo, e sosoo ma le itumalo o Faasaleleaga Nu.5, sa Numera.4 au ae o lea ua Numera 5, sa Numera.3 au, ae o lea ua Numera.4.

O le sui usufono la lea mai Faasaleleaga Nu.5, ou te fia faalogologo lava i ana saunoaga, ia aua foi e ma te sosoo lava ma si... le afioga i le... Ia ae i ai lava isi taimi e pei lava e tau manaio lava le tama e sao lava ia ae sese isi. Ae ou te... o lea foi e finau soo ai ma Olo ma le afioga ia Laauli. Ia ou te tuumumusu atu lava ia Laauli, onosai ia, onosai ia ae tuu ai pea e... aua ua oulua faamasino faafia foi. E leai lava se mea o maua i na mea o le fefaamasino ai, e atili ai ona feeseeseai. Ae a tatou fealofani, oka oka e se manaia. A Peseta, I love you, leaga o oe o lou uso. E sosoo taua, e sosoo taua, ae ana alu lau tama o Vui e te le sao mai. Ia ae faafetai o lena ua e toe...

O le tatou agai atu i luma i le palota lea e lumanai, aua ne i o tatou o faamaualuluga. Ia o tatou o lava ma le agaga, o ai e tofofi mai, tatou o loa i ai.

Afioga Peseta Vaifou Tevagaena: Lau afioga i le Fofoga Fetalai...

FOFOGA FETALAI: Malie lau afioga i le sui usufono mamalu leaga o lea ua e taua le suafa o Peseta Faasaleleaga Nu.5, tulai mai le sui usufono mamalu.

Afioga Peseta Vaifou Tevagaena: Ia ou te le fia faalavelave i le lauga a si ou uso matua. Ae e tele e ma te malaga aua o maua o le au Faasalele. Ioe, e ma te malaga lava na o maua, e vaai mai la si ou uso ua ou savalivali atu, ona sau lea ma nonofo faatasi.

E oo le vaa i o i Salelologa, o musumusumu mai ia te au, fai mai, Peseta, aua e te pisa i se isi. Ou fai atu, o le a le mea ua tupu? Ua ou mao i le pati lea. E a? Ana ou iloa ou te le alu i o. Ioe, ua uma, ia ae ia manuia le lauga lou uso matua. Faamanuia tele le Atua ia umi lou soifua.

O lea ua e saunoa e oo mai lava le faavavau o e tulai mai, masalo o oe ma au e oo mai le faavavau o ta tulai faatasi pea.

FOFOGA FETALAI: Ia, aua e te faafofoga fua ia Peseta. Ioe, fai pea lou tiute faatama matua o le Maota. Ia faaauau le saunoaga.

Afioga TEA TOOALA PEATO: Faafetai lava i lau afioga i le Fofoga Fetalai, ia e leai ua masani foi i upu a si ou uso. E faapena e pepelo lava i isi taimi ae ou te ioe foi i isi taimi. E tiga ona ou faalogo atu e pepelo, ia ae ou te ioe, ioe, e sao lava oe. E faapena lava ia le tatou soifuaga. A fai mai lava, sau iinei i le matou Itu, ou fai atu manaia tele i ina ou te fia alu atu ia outou, a ou musu lava i le mea la e fai mai ai.

Ia, faamolemole ia le tatou Maota, se o le agaga moni lea e i lou nei sui usufono toeaina, o le 4 nei o au Nofoaiga i totonu o le Maota lenei. Ioe, ae ou te le i oo lava i se tofi Minisita. Ou te tutu atu lava i tua i i, ae ou te fiafia lava i le o le le Minisita. Ia aua e te oti lava e te le i oo i le mea la e i ai tofi Minisita. Ia ona e oti fiafia lava lea. Ia aua o le Minisita foi, e tele taimi e te leaga ai. E le sao ai foi. Ia ae ui i lea, se faafetai lava ia outou uma nei ua..

O le Sui Taitai o le Itu Agai, se aua le toe taua ia lau afioga o le Sui, Taitai loa. E a? Ia aua e... se i oo foi i le taimi e toe afio mai ai ia le tou Taitai, ia ona toe sui lea. Ae o le taimi nei, ou te le manao e tau lau afioga o le Sui. O le tulaga o le vanonofo ai o tatou, o le Itu Agai, e leai se upu Sui. E na o le Taitai lava o le Itu Agai ma le Itu Agai, e pau lea. Ae o lea ua sau nei, ua sau ua Sui. Ua Taitai toe Sui, faamolemole lau afioga, Taitai nei loa.

Lau afioga i le Taitai, o lea ua ou tofi atua oe. Ia outou malilie lena Itu, ia outou usitai mai i lau faatonuga. O le Taitai lea mo lena Itu mo le taimi nei. Peseta, ia outou finagalo malilie, o le afioga ia Lauofo, o ia lea ua Taitai. O

le a le toe i ai se upu Sui Taitai. Ia ma le tofi o Anoamaa, Sui Taitai la lena. Ua tai uma le taimi ua tatou faamavae. Ia outou finagalo malilie...

Afioga Alaiasa Moefaauouo Malagaitutogiai Sepulona Moananu: Lau afioga i le Fofoga Fetalai...

FOFOGA FETALAI: Ia, malie le sui usufono, se i tuu atu le avanoa i le sui usufono mamalu o Anoamaa Nu.1.

Afioga Alaiasa Moefaauouo Malagaitutogiai Sepulona Moananu: Se ese le manaia o le faaiuga o le tatou Fono i lenei... a fai o i ai nisi minute o totoe, toe faaopopo se i faaauau pea le saunoaga a le... ae faafetai mo lau pule lea.

FOFOGA FETALAI: Faaauau mai le saunoaga.

Afioga TEA TOOALA PEATO: Ia, o le sui, o le sui usufono lea vaeane lau afioga o Anoamaa, o le lelei ia o lenei tama i aso ia. Sa ou faigaluega i le isi kamupani, ae alu atu sue ia matou tusi. Sa suetusi, o le lelei ia o le tamaitiiti ao laitiiti. E laitiiti mamao ia au, ioe. Ou te iloaina lava e pepelo le sueina o tusi, ia ae na ona aumai lava saina atu ai ma au lea ou te vaaia le... Ia, le tatou Maota, se e lelei le fai ma tatou talie, ae leaga ia le tatou faauuai, aua. E leai se mea lelei e maua mai ai, aua e leai lava ma se isi e atoatoa i luma o le Atua.

O le Vaega toa 3 la ua tulai mai, o lea o le a ou tofi atua ia le tou Taitai. Ou te alu atu taitai outou. O le a tatou vaega.

Tofa Ale Vena Ale (Faleata 4): Lau afioga i le Fofoga Fetalai, pe maua se avanoa...

FOFOGA FETALAI: Malie leaga o lea ua e taua ia le vaega la toa 3, se i tulai mai le igoamatua, Faleata Nu.4...

Tofa Ale Vena Ale: Lau afioga i le Fofoga Fetalai, ia e momoli atu le faafetai tele lava i le saunoaga matagofie a le afioga i le tama matua. I le taimi nei lava lea na e saunoa mai ai o lea ua matou, You are welcome to be the Leader of the Independence, ia o ou manuia na. Ae e te toe alu la e fai lau palota.

FOFOGA FETALAI: Ia, tulai maia le mamalu o Faasaleleaga 4, le tama matua, ia ua latalata foi ina faaiu ia le tatou aso. Ia faaauau mai ia le saunoaga.

Afioga TEA TOOALA PEATO: Faafetai tele lava i lau afioga. Se e ese lou fiafia i lau afioga o le Fofoga Fetalai. Ia o taua e sosoo ia ta itumalo, se a maua ou eleele na e te talosaga ai, ia alofa ane, se o si toeaina la le o Tea, si toeaina ua matua lava ae la e talosaga lava. Ia aua o au nei, ua matua tele. Se o le tele ia...

Na matou faatasi ma le tuua o Lauofo i Palemene ua tuanai, i taimi ua... Na matou faatasi ma Pinati lea le tuua o le Pinati lea ua gasegase nei foi le isi Pinati. Sa o matou faatasi, se o le toatele ia. Ioe, ia sa o matou i ai. Se o au nei e mulimuli i toeaina na sa o matou faatasi. Ia, o le mea ou te fai atu ai lau afioga i le Fofoga Fetalai, se o le toeaina nei o Muagututia Pinati, se o le faiteine ia, avatu ai ma au. E toso atu ai ma au nei ao ou latiiti foi. Se na o ta sese atu ai ita, ae ui lava i na sese, e sese lava ma alu e kofesio, e toe faatoese i le Alii.

Ioe, o au nei o le matua Katoliko lava. A o isi taimi ua ou le alu ai i le kofesio. Ia, a lauga mai Patele, ia outou toaaga e kofesio, faamagalo ia tou agasala, ae ou nofonofo lava ou te le popole. A ou alu atu la ou te komunio, aua fai mai aua e te alu e te tali Alii ae te le i alu e kofesio. A ou tilotilo atu lava o vaai mai Patele, ou toe nofo ou te le alu ou te komunio. Ia faamolemole le tatou...

FOFOGA FETALAI: Ia, ua i ai le manatu o le Nofoa, ia e alofa foi ia te oe le tama matua. Ua i ai le manatu ia ua... e tele pea avanoa.

Afioga TEA TOOALA PEATO: Faafetai....

FOFOGA FETALAI: E manatu foi o lea ua o tatou... e le uma lava le fia faafogafoga o le Palemene ia te oe le tama matua ua leva foi ona e tautua i le atunuu. Ia ae o se avanoa taua foi e maua ai le faamalosia, e faalototele foi i le tatou Palemene. Ia, ae ona ua tatou taunuu i le tatou taimi malolo ona o le Aso Faraile lenei, o le mafuaaga lena.

Ia e i ai foi se isi avanoa, ia pe a tusa ai ma lou finagalo, ia po o lena o le a tau faamaea mai le saunoaga.

Afioga TEA TOOALA PEATO: Ia, o le a tau faamaea atu, ina ne i te i ua ou toe sau i lea vaiaso. Faamolemole lava lau afioga, leaga o lea e faaii lava lau i i, se i oo lava lau...

Lau afioga i le Minisita o le Soifua Maloloina, se e faalupe lava oe e le Maota nei i lou aulelei. Ua leva ona o ta mafuta, ia e alofagia ia le falemai i Tuasivi. Ua matua oti lava le fale e taoto ai gasegase. Ia e alofagia lava. O lea ua i ai le Foisala lea ua oulua faatasi, sui, ia alofagia lata talosaga.

Na fai mai lava ia si o matou itumalo ina o le a ou sau, na pau lava lau tatalo o le tatou falemai. Ia o la ua faafogafoga mai nei ia le matou itumalo. Ia lo tatou itumalo, o lea ua faaleo ia lo outou finagalo i le Minisita, lau afioga Valasi, ia alofagia le talosaga a lenei itumalo. O le falemai lea i

Tuasivi, ia o le centre lena o Savaii i falemai i Savaii, ona faatoa.... e ui mai ai ni gasegase i tua i nisi falemai, ona oo mai ai lea i Upolu nei. Faamolemole ia faaleleia ua leaga lava ia le tatou falemai. O le ta falemai uma lava alii Valasi faamolemole. Ia e alofagia.

Ia o lena ua outou faafofoga mai ia le tatou itumalo, ia ou te talitonu lava, ou te aulia le faaiuga o le Nofoaiga lenei. Ia ona ou toe sau foi lea i le isi Nofoaiga lea... ae ia outou... ia manuia tele ia le tatou itumalo, le tou faafogafoga mai. O a foi taumafaiga a lo outou sui usufono, ia ona pau lava ona na tou fai mai, alu, alu tau lava o lou tafao ai i o. Ia ae leai la o lea ua ou taumafai lava, e taumafai se sao o le tatou itumalo. Ia outou alolofa mai, ma outou talosia mai ia lau faaopeapea iinei, ia, ma ia tatou maua se nofo lelei ma se nofo fealofani a lo tatou itumalo i lo outou tulaga faalupelupeina.

Aiga Taulagi potopoto, ma outou tulaga faalupelupea ua outou... aemaise foi le nofo a faafeagaiga o le tatou itumalo i so o se fata faitaulaga. Ia manuia tele lo outou nopiai ai i lo tatou itumalo, maua lo outou soifua laulelei, faapea foi le tatou itumalo i ona vaega uma lava. Ia maua lo outou soifua laulelei e le gata i totonu o le tatou itumalo, ia ae faapea foi ia o tatou uso i fafo, i latou o lo o alolofa mai ma fesoasoani mai i lo tatou itumalo, ona tulaga tau seleni, ma fesoasoani mai i le taumafaiga o le tatou itumalo i ona vaega uma.

Ia o le matou tala lea, ia manuia tele lau afioga, aemaise le mamalu o lenei Maota. Lau afioga i le Minisita, alofa mai i le tatou... ia ua uma atu se matou... ia manuia tele lava le tatou... O lea o le a o tatou malolo i lenei aso, masalo o le a tatou toe omai i le isi vaiaso atu i tua.

Ia soifua ia.

Na faaalua le agaga fiafia o le Maota i le patipati o latou aao i le maea ai o le saunoaga a le tama matua.

FOFOGA FETALAI: Ia, o lea ua e silasila mai ua patipati le Maota, ia i le tofa faalele a lau afioga i le sui usufono matua o le Maota. Ia, malo lava le tofa. Faafetai foi mo le... i saunoaga faalaeiau ia ma faalototele i le tatou Maota, ia aemaise foi o le tatou aufaigaluega. O le mea lea, ia faafetai, faafetai tele lava ia te oe le alii matua, ua taualii matua atu ia le sui usufono mamalu o Faasaleleaga Nu.4, ia alofagia e le Atua ia maua pea lou soifua laulelei ma lou malosi, ia e aoga foi e faasoa ia aua le tatou Maota ma le tatou faatofalaiga. O le mea lea, malo faafetai, faafetai saunoa.

Ia o lea foi ua o tatou taunuu i le taimi malolo o lenei aso, ae momoli atu lava le faamalo, ma le faafetai i le paia o le Palemene mo le tatou galuega. E le gata i lenei aso fono, ia ae faapea foi ia lenei vaiaso atoa. Faafetai tapena, faamalo tapena i itu uma. Faamalulu atu foi le Fofoga Fetalai, a fai o le a se gagana a le Nofoa ua sopoutu i lo tatou va, ou te faamalulu atu i le Palemene, alolofa ma faatafea i nuu le aina se faaletonu.

Tatou talosia le alofa o le Atua ia le faigamalologa i le faaiuga o le vaiaso aemaise o le agai atu i Lona Sapatu Paia, ia maua foi se faasiligamalosi faaleagaga mo le faaauauina o le tatou valaauina i lena vaiaso fou.

Faafetai foi i Ofisa Sili o Pulega o Matagaluega, Faalapotopotoga Tumaoti o le tatou Malo, mo le auaunaga lagolago aua le Fonousu o le tatou atunuu. Faamanuia le Atua i lo outou valaauina. Samoa ma lau tapuaiga, i ou itu faalupelupeina, faafetai tatalo, faamalo tapuai. Ua manuia faiva o lau Palemene ona o lau tapuaiga. Faamanuia le Atua i si o tatou atunuu.

E le tuuina se faafetai a le Palemene i auaunaga o lo o tautuaina Taulumaga a le tatou Maota i aso uma, i le Matagaluega o Leoleo, le Matagaluega o Fesootaiga ma Faamatalaga Tekonolosi, le Pulega o Tineimu ma Faalavelave Faafuasei, Faalapotopotoga o le Malosi Faaletise, le Kamupani a le Kooline, faafetai mo lo outou auaunaga. Ia faamanuia le Atua i lo outou soifua tautua.

O le a fai ia se tatou malologa pe a tuua ma afifio atu le paia o le tatou Maota, o a foi feau o faatali mai i le toega o lena aso, ia faamanuia le Atua. Ae tatou te le i tolopo, ou te talosaga atu i le sui usufono o Tamaitai mai Alataua Sisifo, se i e saunia ia se tatou tatalo e faaiu ai ia le tatou Fono.

Na tolopo Taulumaga a le Fono Aoaofa Faitulafono i le itula e 12:07 i le aoauli seia aulia le Aso Lua 24 o Ianuari 2023 i le itula 9:30 i le taeao.